

Fuellas

d'información d'o Consello d'a Fable Aragonesa

I.S.S.N.: 1132-8452
• Publicación bimestral
en aragonés de cultura,
luenga e literatura •
• 34^{ena} añada •
• lumero 207-208 •
• chinero-abril 2012 •
• Pre: 3 euros •

Jesús VÁZQUEZ OBRADOR

Sobre fonética histórica del aragonés

36

entrar vio flaco lugaz enel muro forano et caualgado
sobre su cauallo con la mano drichta designando co
el dedo dixo poraqui se puede entrar Huesca et
la manga dela loriga se abrio et un moro balleste -
eo que estaua en aquel lugar con una sayeta por la
manga dela loriga fijo lo enel costado. Et el no
dixo res mas fuesse por la huest et fijo Jurar a su
fillo don Pedro por Rey et las gentes se marauil
laron de questo et jurado por Rey fizole yrome
ter que non se leuantasse del sitio entro que a-
uies Huesca a su mano diziendole muitas de co-
sas q̄l bauien de venir. Et conortando su huest
fizose sacar la sayeta et murio. Pero por la su
muert non dio entender el fillo q̄ ninguna fizies
el padre tanto comenzó bien de regir por do bu-
nieron grant conuerto los dela huest. Muerto



a tefla de cuatro fuellas 7

FUELLAS D'INFORMAZIÓN D'O CONSELLO D'A FÁBULA ARAGONESA
34^{ena} añada • lumero 207-208 • chinero-abril 2012

FUELLAS



Publicación bimestral en aragonés
de cultura, luenga e literatura, creyata en 1978.
Organo de comunicación
d'o Consello d'a Fábula Aragonesa
I.S.S.N.: 1132-8452

Redacción e almenistración: Abenida de Os Danzantes,
34, baxo. 22005 Uesca / Trestallo postal 147. E-22080
Uesca (Aragón, España). Telefono e facs: 974 231 513.
www.consello.org

Edita: Publicacions d'o Consello d'a Fábula Aragonesa (Lumero de Rechistro d'Interpresas Editorials: 2.281/81).
Imprentación: Imprenta La Encarnación, S. L. c / Algáscar,
s/n, 22004 Uesca. Deposito Legal: Hu-512-79.

Enfiladura: Francho Nagore Laín.

Secretaría de Redacción: Paz Ríos Nasarre.

Almenistración: Chorche Escartín Guillén.

Consello de Redacción: Santiago Bal, Zésar Biec, Antón Eito, Jesús L. Gimeno, Alberto Gracia, Chusé I. Nabarro, Chusé Antón Santamaría, Rafel Vidaller.

Acotrazio e correzioni: Chusto Puyalto.

Debuxos: Chesús Lorién Gimeno Vallés.

Fotos: Tresa Estabén, Rafel Bidaller, Zésar Biec.

CONDUZIONS: Trestallo postal 147. E-22080 Uesca.
Telefono e facs: 9774 231 513. Corr.el: cfa@consello.org
CONDUTA AÑAL (FueLLAS + Luenga & fablas): 25 euros.
Pre de lumero escabdalo de FueLLAS: 3 euros.

TA FER A CONDUZIÓN: Nimbiar o nombre e l'adreza, chunto con os diners d'a conduzión (por meyo de cheque u talón bancario u chiro postal). U millor: nimbiar una fuella con autorizacióñ ta que o CONSELLO D'A FÁBULA ARAGONESA cobre a conduta por banco (no olvidar os datos presonais, l'adreza d'o banco e o lumero d'a cuenta corrién, a calendata e a firma).

OS TREBALLOS que se nimbén ta ra sua publicación podrá estar refusatos por o Consello de Redacción u acotraziatos en aspeutos formals. Os testos ta "informazions curtas" han d'estar d'entre 5 e 15 ringleras, con redacción periodistica e ochetiba. Os treballos, as rezensions e os testos de creyazión literaria pueden tener de 1 a 3 fueLLAS. Os artículos d'opinión, una fuella. De o dito en os escritos firmatos l'único responsible ye o suyo autor u a suya autora. A rebista no comparte nezesariamén as suyas afirmazions. A opinión d'a rebista biene expresata, en o suyo caso, en o Editorial. Si bel leutor u bella leutura troba bella cosa intresán en ista publicación e deseja fer treslazión d'ixo por bel meyo mecanico u eleutronico, por fotocopia, u cualsquier atro prozedimiento, ye espresamén autorizato/a á fer-lo, sin atra condición que cuaternar a suya prozedenzia.

ENDIZE

Autualidá

Informazions curtas..... 3-10

Opinión

QUINTANA, Artur: *Animal tetador* 11
MELERO, José Luis: *Incunables* 11

Creyazión literaria

CEBOLLERO, Lorenzo: *A bida d'o pastor d'antes* 12
BIELSA, Chuan Chusé: *Dos poemas* 13

Trebaldos

MARTÍNEZ TOMEY, Miguel: *Os alavez d'a nazión aragonesa* 14-22
BAJÉN, Luis Miguel: *Tant amare, un poema en mozarabe d'o sieglo onzeno* 23

Rezensions

SORROSAL, Úrbez: *Le'n dizié a ra nuei*, de Juan Carlos García Hoyuelos 24
VIDALLER, Rafel: *Dizionario botanico e zoologico d'o Piemontés* 25-27
NAGORE, Francho: *Sobre fonética histórica del aragonés*, de J. Vázquez Obrador 28-29
GRACIA TRELL, Alberto: *L'Alto Alcanadre: a montaña olbidata* 30

Clamamientos

XIII Premio «Ana Abarca de Bolea» (2012) ta libros de poesía en aragonés 31

Cuentraportalada

Luenga & fablas, 12-13 (2008-2009) 32

www.consello.org


INFORMAZIONS CURTAS

Presentación d'o libro *Sobre fonética histórica del aragonés*, de J. Vázquez Obrador

O día 22 de febrero se fazió en Uesca a presentación d'o libro *Sobre fonética histórica del aragonés*, de Chesús Vázquez Obrador. O libro replega siete estudios sobre diferenx temas e aspectos de fonética istorica aragonesa, belunos d'os cuales no yeran estatos dica agora guaire estudiados, u mica. Fa o libro o lumero 7 d'a colección “A tefla de cuatro fuelleas”, de Publicazions d'o Consello d'a Fable Aragonesa. En a edición han colaborato o Instituto de Estudios Altoaragoneses e o Grupo d'Investigación Emerchén sobre Filolochía Aragonesa (FILAR).

A presentación se feba en a bastida d'o Día Internazional d'a Luenga Materna. Estió a ras güeito e meya d'a tardada en a Sala de Chuntas d'a Facultá de Zenzias Umanas e d'a Educación, e contó con a presenzia de buena cosa d'alumnos/as d'o Diploma d'Espezializazión en Filolochía Aragonesa, tetulo propio d'a Unibersidá de Zaragoza que organizaba l'autor. Presidioron a Bizerreutora d'o Campus de Uesca, Pilar Bolea, e o Director d'o Departamento de Lingüística Cheneral e Ispanica d'a Unibersidá de Zaragoza, Javier Giralt. Tamién, amás de l'autor, bi estioron Chusé Inazio Nabarro, Presidente d'o Consello d'a Fable Aragonesa, e Fernando Alvira, Director d'o Instituto de Estudios Altoaragoneses.

Como dizió l'autor, iste no yo “o libro” sobre fonética istorica de l'aragonés, so que “un libro” sobre ista materia. Con tot, afunde con tino en bellas custions difízils, como a d'as consonans cheminatas e os resultados d'o lat.-LL- en aragonés. Asperamos que, chunto con otros temas más conoxitos e estudiados, pueda estar l'alazet de “o libro” (ye dizir, o manual, curso u libro se testo) sobre fonética istorica de l'aragonés. [Fertús Nasarre Larués]



Chesús Vázquez Obrador en a presentación d'o suyo libro *Sobre fonética histórica del aragonés*, o 22 de febrero en Uesca.

Mai

A colla mosical oszense “Olga y Los Ministriles” ha lanzato ta o mercato o suyo segundo disco, titulato *MAI*, que ye o título d'un de os temas, con letra d'Áñchel Conte, qui ye l'autor d'as letras de dos de os temas (“Mai” e “Di-me que sí”), toz dos en aragonés, con mosicas de Blas Coscollar e Gabriel Sopeña. O treballo ye composato por una uzena de temas, sais basatos en o folclore aragonés e otros sais de nueba creyazón. [O. Grazia]

O proyeuto d'animazión cultural “Luzía Dueso” continua enta debán

Por más que os retallamientos se fan corriens en todas as almenistratzions, tamién en Educación, manimenos o Proyeuto d'animazión cultural “Luzía Dueso” continua iste curso escolar 2011-2012, ya en a suya seisena edición. Como ye pro conoxito, iste proyeuto, que enfila Mª Pilar Benítez (mpbenitez@educa.aragon.es), ye un proyeuto d'o Departamento d'Educación, Cultura e Espuerto d'o Gubierno d'Aragón que tien como ochetibo ofrir á os zentros escolars un conchunto d'autibidaz d'animazión en aragonés



que abrancan diferens arias curriculars; tamién ye ta ofrir a os zentros asesoramiento ta que els mesmos puedan creyar os recursos que prezisen. Con ixo, se preba de potenziar e dinificar l'aprendizache de l'aragonés en cheneral, e as clases que se fan en bens zentros d'amostranza, asinas como fazilitar a o profesorato autibidaz d'aprendizache sobre diferens aspeutos culturals, e en fin, dar notorio de presonas que emplegan l'aragonés como idioma de cultura en diferens dembas d'o saper zientífico e umanístico. En iste curso s'ofrexe, á trabiés d'o proyeuto, un catalogo de bentidós autibidaz, d'entre as que os zentros d'amostranza pueden trigar as que más lis cuaqueñ. [F. Nasarre]

Leyendas aragonesas

Lo que nos contaban los yayos, cuentos e leyendas de l'Aragón machico e misterioso, quiere deixar grabatas en o papel estorías que han ito pasando de güelos á nietos, de pais á fillos, e que no han de perder-sen. A triga e adautazión de testos ha corrito á cargo de Santiago Cabello e José Ignacio López Susín, e son estatas ilustratas por Ángel Lalinde. Cada cuento u leyenda ba acompañata d'información complementaria e autibidaz que pueden estar utilizatas por os pais u profesors. O libro, de

tapa dura e á totas colors, ye estato publicato por Aladrada Editorial, e bi ha por meyo testos en catalán e aragonés, traduzitos por Mario Sasot e Rafel Vidaller. [O. G. B]

As calandretas entadebán

As calandretas (escuelas d'ocxitano) de Narbona embabuquian á os padres de os escolanos. O lumero d'istos medra en as zagueras añadas e os espazios de a "Granhotá" (creyata en 1993) ya no aduben.

<http://www.midilibre.fr/2012/01/17/les-ecoles-occitanes-victimes-de-leur-succes,444914.php> [Ch. A. Santamaría]

As lenguas rechionals puyan

A lo que se beye, cada bez son más apreziatas en Franzia. Toz os estudios amuestran que (á penar de retizenzias de bens padres) os zagals de as clases bilingües, en iste caso de o Bearne e de o País Basco, "tienen millors resultados...". <http://www.sudouest.fr/2012/01/30/les-languages-regionales-au-tableau-619165-4329.php> [Chusé Antón Santamaría]

Explolangues

En a primera semana de febrero se celebró en París "Explolangues". Ista esposición, en a 30ena edición, estió una manifestazón de refirme de a lengua franzesa e un mensache de dibersidá que se nimbó por o mundo. <http://www.explolangues.fr/> [Ch. A. S.]

CHA denunzia en Europa o incumplimiento d'a Lei de Luengas

O Presidén de CHA, José Luis Soro, nunzia que se celebrará una reunión en Estrasburgo en a que se denunziará o incumplimiento d'a Carta Europeya d'as Luengas Minoritarias.

CHA ha lebato á Europa una greuche sobre o incumplimiento d'a Lei de Luengas en Aragón que, dimpués de dos añadas dende a suya aprebažión, encara no se ye desembolicata. L'autú d'o Gubierro PP-PAR incumple a Carta Europeya d'as Luengas Minoritarias por o que, dende CHA, se considera impresindible que tanto ro Consello d'Europa como ro Parlamento sigan cosziens d'a esprotección que sufren en Aragón. O Presidén de CHA, José Luis Soro, chunto á o responsable d'afers europeyos, Miguel Martínez Toméy, han mantenito una trobada con Ilya Subbotin, alto funzionario d'o Consello d'Europa. En ista reunión o Presidén de CHA tamién ha parlato con eurodeputatas d'ALE (Ana Miranda e Tatjana Zdanoka) e con o Secretaire Cheneral d'iste partito en o Parlamento Europeyo (José Luis Linazasoro).

D'as chestions feitas s'han alcanzato dos compromises. O primero, una reunión en Estrasburgo con o masimo responsable ta ro cumplimiento d'a Carta Europeya d'as Luengas Minoritarias con l'ochetibo de que entrebienega sobre iste asunto drento d'o Consello d'Europa.

En segundo puesto, CHA compareixerá en o intergrupo parlementaire (fachato por 50 deputatos e deputatas de distintas fuerzas políticas) ta esposar o



José Luis Soro, Presidén de CHA entrega a Ilya Subbotin, alto funzionario d'o Consello d'Europa, a denunzia sobre o incumplimiento d'a Carta Europeya d'as Luengas Minoritarias.




José Luis Soro, Presidén de CHA, con a eurodiputata Ana Miranda, d'o grupo parlamentario d'Alianza Libre Europeya (ALE), e Ilya Subbotin.

problema qu bi ha con o desembolique e protección d'as luengas minoritarias en Aragón.

O Presidén de CHA, José Luis Soro, siñala que “no solo bimmos que un grieu incumplimiento d'una Lei sino que, antimás, se nunzia una modificación á ra baxa, con o que as luengas minoritarias d'Aragón encara quedaran más esprotechitas”. [30.03.2012, ARAGÓN EN EUROPA]

L'Aínsa: zertamen de cuentos “Junto al fogaril”

Ye feito ro clamamiento publico ta o zertamen de cuentos curtos “Junto al fogaril”, que organiza o Conzello de L'Aínsa-Sobrarbe chunto con l'Asoziazión Cultural “Junto al



Fogaril". Ye a zinquena edición. Se i pueden presentar treballos orichinals e ineditos en aragonés u en castellano. O plazo d'entrega escomienza o 9 de chinero e remata o día 16 de marzo. A estension d'as obras ye d'entre 3 e 12 fuellas, de tematica libre; cada autor puede presentar un masimo de dos obras. Bi abrá dos premios: o primero, de 1000 euros; o segundo, de 500 euros. Tamién s'atorgarán dos accésiz: uno á un relato breu de tematica sobrarbenca (300 euros) e atro á un relato breu feito por una presona menor de 18 años (200 euros). Toz os treballos –en castellano y en aragonés– concurren por igual á os premios e accésiz. Más información en o Conzello de L'Aínsa-Sobrarbe, Conzellería de Cultura. [C. R.]

O Fogaril, d'Asín de Broto

L'asoziazió de bezins d'Asín de Broto, pertenexién a o munizipio de Broto (Sobrarbe), constituta fa uns añez, rezibe o nombre d'*O Fogaril*. A prinzipal fayena ye conserbar o rico patrimonio cultural d'o lugar e dica agora s'ha zentrato más que más en a reconstrucción de l'armita de San Mamés. O lugaret no tiene que bella duzena de bezins fixos tot l'anyo por o que una asoziazión d'ista mena fa buena onra. Nomás

trayemos ista notizieta ta istas pachinas porque nos parixe prou importán que os lugars altoaragoneses continen mantendo biba a flama d'a luenga aragonesa –que tanto ha sofierto e tan estigmatizada ye estata sozialmén– a trabiés d'as suyas parolas e de bez dignifican o idioma en o territorio propio. [A. G.]

Agüero: a fiesta d'as mascaretas

Iste año 2012 se zelebró o Carnabal en Agüero o 18 de febrero. Ye a zinquena edición, pos a recuperazión d'o Carnabal en Agüero se fazió en 2008. Muito tarde (en comparanza con atros lugars), pero se pilló con fuerza. Como beyemos en o cartel, a ras onze d'a mañana bi abió "taller de mascaretas" e dimpués un bermut en o salón d'o "Dude". Ya de tardes, a ras seis e meya, o inizio en a plaza alta d'a ronda por o lugar, con l'acompañamiento d'a Ronda de Boltaña. Ta rematar con o baile de disfraces (u siga, de mascaretas) en o salón d'o "Dude". Bien pincho o cartel, con ixe detalle d'a foto con bastida, como si estase una bentaneta por do beyemos a fiesta d'as mascaretas d'Agüero. Solo i trobamos a faltar que o programa tamén bienga en aragonés. Ye fázil e seguro que ta l'añada benién se puede fer. [F. N. L.]

Cantas corso-bearnesas con chuntamén

L'asoziazió de padres de a escuela de Sévignacq, con inchaquias de replegar diners, organizó una beilata de cantas corso-bearnesas, una par d'atra, en do partiziporon una colla de Morlaas, Cant'l Danç, GH Gasseppu Cannata e os alunnos de o lugar d'Escoubés. <http://www.sudouest.fr/2011/10/10/des-chants-corso-bearnais-a-l-unisson-522382-4117.php> [Ch. A. Santamaría]


No cal tallar as nuestras radizes

A fidelidá de os pueblos á ras suyas tradizions s'interpreta, agora, como una

ferramienta prou útil contra ra intoleranza e o nazismo. Ixa ye a conclusión a ra que son plegatos en Italia en estudios reziens. http://www.ilgiornale.it/cultura/quelli_che_vogliono_tagliarci_radici/30-01-2012/articoloid=569535-page=0-comments=1 [Ch. A. Santamaría]

Esfuellar, esfilarchar y espinuchar

En o cabo d'ño se recuperó en Sémeac (Burgos) "la soirée de l'espelouqaire". I han participato una sesentena de personas ta ras cuales a tierra e as fainas de labranza representan baluras fortals de solidaridá. De mui buen abenir, contando chanadas e chentando buena lifara, dos tonelatas de panizo pasoron por as suyas mans. <http://www.ladepeche.fr/article/2012/01/15/1261175-semeac-tradition-respectee-avec-la-soiree-de-l-espelouqaire.html> [Ch. A. Santamaría]



/ que más paize capital, / han feito una residencia / en o cobalto d'o lugar. / Si puyo por a bentana/ no me tiens que carrañar; / cuando a tu te dé a gana / ya me'n tornaré a baxar.» Como se i beye, aproveita bellas coplas tradicionals. A canta de Biella Nuei competiba con "Solenco", de 20 de Kopas, "Rumballa de Marichuana", de Zarrakatralia folk, e "Mai", d'Olga y los Ministriles. Por zquierdo, iste nuevo disco de Biella Nuei se presenta, drento d'as programazions de "Aragón, tierra abierta", que se fan en Uesca por San Chorche, o día 20 d'abril en o Zentro Cultural Matadero. [F. N. L.]

Presentación de *As Crabetas*, d'Enrique Satué

S'ha feito en o salón d'autos d'o IEA a presentación d'o libro *As Crabetas*, libro escrito por Enrique Satué en o que presenta l'universo e o imachinario d'os ninos e ninas altoaragoneses en o sieglo XX. O libro leba ilustracions d'o dibuxairee Roberto L'Hotellerie e se presenta como una mena de "libro-museo". Como se sape, "as crabetas" ye a denominación en aragonés d'a constelación de "Las Pléyades", a unica cosa que lis feba compaña, astí alto en o zielo, a os mozez repatans en as nueis que yeran de cabañera. [C.R.]

Millor canta en aragonés de 2011

A "Ronda d'a Galliguera", d'o disco *Sentido creixer a tasca / Oyendo crecer la hierba / Sentint créixer l'herba*, de **Biella Nuei & os Bufacalibos** (Deposito Legal Z-40038-2011, S.G.A.E. LN-035), ha rezibito o premio de 2011 a ra millor canta en luenga minoritaria en os Premios d'a Mosica Aragonesa. Ista ye a letra: «L'otro día un montañés / qué mala cara que feba, / que l'iba muerto una obella / d'as mejores que teneba. / Santolaria pilaloca, / en Murillo figoneros, / en Ayerbe carnicravas / y Agüero caracolero. / Agüero ya no ye Agüero,

Partido Franzia-Italia en bearnés

En o tarabidato de a *Setmana de la lengua de la communauté de communes d'Orthez* (Biarne) una de as curiosas autibidaz consistió en comentar o match de rugby Franzia-Italia ta "les ahuecats de la veishiga" (os afanatos por a bixica) en lengua bearnesa. O taute estió Georges Lamarrière, direutor de a calandreta d'Orthez. <http://www.sudouest.fr/2012/02/06/le-match-en-direct-et-en-bearnais-625807-4329.php> [Ch. A. Santamaría]

Discurso de Otín y Duaso

Ye publicato o discurso leito debán d'a Reyal Academia Española d'Arqueolochía e Cheografía por Francisco Otín y Duaso en 1868, agora editato por Aladrada Ediciones e o Instituto d'Estudios Altoaragoneses. O editor literario

e o sobrebono estudio introdutorio ha estato feito por Francho Nagore Laín.

Francisco Otín e Duaso, de cuna sobrarbesa e de familia liberal, amigo en a suya chobentú de Francisco de Goya e magistrato en a Reyal Audienzia de Filipinas, ingresó en l'Academia d'Arqueolochía e Cheograña en 1868 con un discurso sovre o lesico aragonés. Iste libro contiene o testo leito por Otín en l'auto d'a suya rezeución d'academico e o Discursu de contestazión á cargo de l'academico Mariano Nogués y Secall. Se trata d'un documento de singular importanzia t'a lexicografía aragonesa. [O. Grazia Bernués]

Premios "Villa de Benasque"

En a primera semana de chinero se dioron a coñocer os ganadors d'o zertamen literario "Villa de Benasque", en a 27 edición, correspondién a 2011. L'auto d'entrega se fazió en Benás a finals de febrero. Os premios de literatura en aragonés benasqués son estatos ta María Paz Estop, Milagros Pallás, Pepita Mora e Laura Arcas. En a sección "Neu Polbina", ta autors consagratos, o reconoximiento estió ta José Sanmartín e Alfredo Barrau.. En castellano, o premio de narratiba estió ta Gaspar Nieto; en poesía, ta Gregorio Eduardo Zumelzu; en o premio ta autors aragoneses, ta Eva Balaguer e Francisco López Serrano, respetibamén. [C. R.]

Constitución d'o Congreso permanén d'a luenga oczitana

O 16 d'abiento de 2011, en Burdeus, David Grosclaude, consellero rechional d'Aquitania, delegato ta ras luengas e culturas rechionals, fazió a constitución d'o Congreso permanén d'a luenga oczitana, en presenzia d'os representants d'as rechions de Meidía-Pirinés, Luengadoc-Rusillón e Rodano-Alpes e d'o Menistério d'a Cultura. Se trata d'un nueba institución científica e moral independién, que representa a os usuarios e fabladors de l'ocxitano. As suyas trazas d'azión serán a produción de ferramientes lingüísticas de referencia (dizionario, gramaticas, ez.), a regulazión científica (recomendazions) e a imbestigazión aplicata. Tien como prenzipios o respeto a ra unidá e a ra dbersidá de l'ocxitano, a estabilidá, a representatibidá

d'as rechions lingüísticas d'o territorio d'oc, a colechiliadá, a confidencialidá d'as dezisions e a difusión d'a informazión.

Iste organismo se ye constituyito a trabiés de l'APORLOC (Asoziazió de prefigurazión de l'organismo de regulazión d'a luenga d'oc) e achunta as instituzions e as federazions istoricas d'a luenga oczitana (tanto en Franzia como en España e Italia). O Menistério d'a Cultura e os entes territorials (Aquitania, Luengadoc-Rusillón, Meidía-Pirinés, Rodano-Alpes) partizipan como miembros consultors.

A instituzión creyata se refirma en dos Consejos asesors: o Consello lingüístico e o Consejo d'usuarios. Ta poder responder a os amenisters más urchens d'o publico, son estatas enzetas bellas obras, entre atras a creyazón d'un dizionario elemental franzés-ocxitano. [Ú. Sorrosal]

Presentazión de *Astí en do l'aire sofla... en castellano*

A librería Anonima, de Uesca, con Chema Aniés en a capeza fendo d'anfitrión, estió o espacio trigato ta fer o biernes 13 d'abril a presentazión publica d'a edición en castellano de *Astí en do l'aire sofla ta sobater as fuellas de os árbols*, orichinal en aragonés que estió publicato en 1989 por Publicazions d'o Consello d'a Fabla Aragonesa e que otenió o Premio "Arnal Cavero" en 1990.

O tetulo d'a edición en castellano ye una traduzión literal de l'orichinal aragonés, *Allí donde el viento sopla para agitar las hojas de los árboles*. La publica (Zaragoza, 2011) Gara d'edizions como lumero 6 d'a colezione "ViveVersa". Conserba o debuxo orichinal d'a portalada, feito por Chesús Lorién Gimeno Vallés ("Chencho") e inspirato en o cabo "A gran birolla de as colors". As ringleras d'a cuentraportalada tamién son estatas aprobeitatas, cuasi literalmén, nesas en castellano.

Como dizió o editor, Chusé Aragüés, ye una d'as grans nobelas d'as zagueras añadas d'o sieglo XX (no solo en aragonés, sino en cualquier luenga). Emponderó a suya riqueza lingüística, o suyo lirismo e os nubos emplantillamientos literarios, o que la claba en a pos-modernidá.



Chusé Inazio Nabarro en a presentación d'a edición en castellano d'a sua nobela *Astí en do l'aire sofla ta sobater as fuellas d'os árbols*, feita en a Librería Anonima de Uesca o 13 d'abril. Chunto a el ye Chusé Aragüés, de Gara d'Edizions, editorial que ha feito a edición en castellano; dreito, Chema Aniés, d'a Librería Anonima. [Foto: T. Estabén]

L'autor, Chusé Inazio Nabarro, emponderó o quefer de Joël Miró, d'a Unibersidá de Burdeus, con una traducción muito literal que respecta e treslada toz os matizes e toda a riqueza de l'orichinal. Dizío que se feba contento d'ista traducción e, en cheneral, d'as tongadas de traduzions d'a sua obra que son beyendo a luz: dimpués de que se publicase en castellano *Malos tiempos* (tradución de *Tiempo de fabas*), s'ha traduzito *Reloch de pocha* en ruso (dos edizions ya) e en castellano, e agora s'edita ista treslazión en castellano d'*Astí en do l'aire sofla...* e se nunzea a sua traducción en franzés.

Asperemos que tot isto faiga que se conoxca más e millor a literatura en aragonés, en cheneral, e que se leiga por más chen a obra de Chusé Inazio Nabarro, uno de os nuestros autores en aragonés más internazionals. [Francho Nagore]

Luenga & fablas, 12-13

Ya ye imprentato ro lumero 12-13 d'a rebista añal d'estudios e documentación *Luenga & fablas*, correspondién a 2008-2009. Se i publica una parti d'os treballos d'a Zinquena Trobada d'Estudios arredol de l'aragonés: en concreto,

tres ponenzias e onze comunicacions (os demás treballos (atras tres ponenzias e diez comunicacions) se publicaron en a rebista *Alazet*, 20 (correspondién a 2008). Antiparti, se i publican cuatro informes e quinze resoluzions d'o Consello Asesor de l'Aragonés, asinas como bellas rezensions. Puede beyer-se o indize completo en a cuantraportalada d'iste lumero de *Fuellas*. Se pueden demandar exemplars en o Consello d'a Fable Aragonesa (cfa@consello.org / 974 231 513). O lumero 14 (2010) ye quasi presto ta ra sua imprentación. En o lumero dople 15-16 (2011-2012) se publicarán bels treballos d'a VI Trobada. Ta iste lumero encara se pueden nimbiar reseñas de publicacions. [F. N.]

Fuellas achusta o tirache e a capezera

Dende iste lumero 207-208, primero de l'añada 2012, a rebista *Fuellas* achusta o suo tirache á 700 exemplars, por tal d'amantar más o lumero d'exemplars imprentatos e distribuyitos. Dica agora s'emprentaban mil exemplars, pero gosaban quedar-ne en l'alamagazén entre 250 e 300 exemplars, o que ocasiona problemas d'espazio, antiparti que se malmete muito papel, ya que d'exemplars biellos solo se gosa bender-ne belunos demandados por Bibliotecas

u colezionistas. Por atro costato, segantes apre-bó l'Asambleya zaguera de trazas chenerals e concretó ro Consello de Redazión, dende agora en a capezera d'a publicazión amanexerá sola-mén o tetulo **Fueltas**; en drento, en a plana 2, en do s'especifican os datos d'a publicazión, se meterá: *Publicazión bimestral en aragonés de cultura, luenga e literatura, creyata en 1978. Organo de comunicación d'o Consello d'a Fable Aragonesa. I.S.S.N.: 1132-8452.* Ye tamién intinzione d'ir esbiellando ro Consello de Reda-zión: ta ixo se demanda que qui i quiera colab-orar se meta en contauto con o enfilador u a secretaria de redazión. [C. R.]

Siñal d'Onor

Espiello, o Festibal de zine etnolochico de Bol-taña, continando con a faina de dinificar o em-plego de l'aragonés e dar-li más gran proyezión publica, ha denominato un nuevo premio creyato en ista edición como “*Siñal d'Onor*”. Ten-drá caráuter onorifico e reconixerá una ampla trayectoria de treballo en o mundo d'o zine. O primero en rezibir-lo será Carlos Saura. [F. N.]

Pilar Benítez premiata en o concurso sobre María Moliner

María Pilar Benítez, profesora en o Diploma d'Espezializazión en Filolochía Aragonesa e coordinadora d'o Proyeuto “Luzía Dueso”, ha rezibito ro premio en o Concurso de relatos curtos “María Moliner”, creyato por a Comarca d'o Campo de Cariñena, con a enchaquia d'o cabu d'ño d'o nacimiento d'a lexicografa. En o suyo relato, Pilar Benítez literaturiza bels datos biograficos más esconoxitos de María Moliner, naxita en Paniza en 1900. L'auto d'entrega d'o premio se fazió en Paniza o 28 de marzo. [F. Nagore]

Luenga de fumo

Una nueva edición d'o programa “Luenga de fumo”, que fan de conchunta o Consello d'a Fable Aragonesa e o Conzello de Uesca, se ferá en os días arredol de San Chorche, con a ideya de dar a conoxer a cultura feita en aragonés. Ye prebisto un rezital de Zarrakatralla Folk o día 19 d'abril; o 24 d'abril bi ha una trobada litera-ria con Óscar Latas, ganador d'o zaguer premio

“Arnal Cavero”; o día 25 se proyeuta a zinta en aragonés ribagorzano “Cosetas d'adentro”, de Lola Gracia. Antiparti, bi ha dos sesions de cuentacuentos en aragonés: o días 14 (Ara cultural: “Prou, prou luen”) e 28 d'abril (Pol: “Falordietas”). Daremos cumplita cuenta d'os autos en o benién lumero de *Fueltas*. [C.R.]

Modificazión en o Diploma d'Espezializazión en Filolochía Aragonesa

O Consello de Gubierno d'a Unibersidá de Zaragoza, en a suya zaguera reunión d'o man-dato, tenita o 30 de marzo, aprebó nuebos es-tudios propios e modificazions de belatros. En o respetuible á o Diploma d'Espezializazión en Filolochía Aragonesa, que s'imparte en o Campus de Uesca, s'aprebó l'aumento de 26 a 30 creditos, que se traduze en más oras en bellas asinaturas. [F. N. L.]

27 palabritas

A editorial Apila, de Zaragoza, ha publicato un libro con iste tetulo. Leba por soztetulo: “Primer abecedario aragonés para zagalos y talludos”. Ye acobaltable que emplegue “abeceda-rio” por “bocabulario”, tal como ye tradicional en Aragón. Cada palabra ye representata por meyo d'una ilustrazión, cada una feita por un ilustrador diferén. Asinas resulta un libro re-tantador por os debuxos. En cuanto a os bocables, be son, por exemplo: *capuzar, chandrío, badil, sargantana u cuquera*. Muito chiquet ye o caudal lesico que i trovamos; con tot e con ixo, asperemos que faiga onra ta que bels mo-zez aprendan bella palabras aragonesa. [U. S.]

As rebaxas d'a Lei de Luengas

Segantes leyemos en a prensa diaria d'o 24 de febrero de 2012, o Gubierno d'Aragón tien parato un borrador de modificazions en a Lei de Luengas, en o cualo: – se suprinen as denomi-nazions de *aragonés e catalán* e o suo reconoximiento como luengas propias e isto-ricas d'Aragón; – s'eliminan as academias d'o catalán de l'aragonés; – s'anula l'articulo que premitiba a os ziudadanos emplegar l'aragonés u o catalán en as Almenistratzions Publicas d'os territorios propios de cada luenga. Asinas, as modificazions son tan radicals que quasi serba una lei diferén (e muito pior). [Chuan Guara]

Animal tetador

És ben sabut que part dels nostres intel·lectuals, institucions i mitjans de comunicació s'esforcen de fa temps en destruir aquest patrimoni dels espanyols que són les llengües minoritzades –aragonès, basc, català ...-. Fent això han aconseguit que molts conciutadans interioritzen aquest missatge destructor, creant en les mateixes víctimes –els ciutadans de llengua aragonesa, basca, catalana, ... – profunds complexos d'autoodi, que de vegades esclaten violentament, com en els recents i tètrics fets de la Codonyera i la Freixneda.

Una de les tècniques més utilitzades consisteix en ridiculitzar aspectes de la llengua que es desitja discriminar. I és així com l'autoodi i l'afany autodestructiu s'ha pogut escampar en col·lectius que en principi hi pareixien immunes. Podem veure que determinats grups i associacions profundament compromesos en l'estudi, foment i reforma de l'aragonès ridiculitzen importants mesures en el mateix sentit per part del Consello d'a Fable Aragonesa.

Un dels camps més atacats és l'ortografia del Consello: si ja és ridícul, argumenten, escriure *zezina* o *eraldica*, encara ho és més grafiar *Biba Balenzia!* I així aconsegueixen l'aplaudiment barat d'un públic profundament acastellat i immers en l'autoodi, al qual li costa molt d'entendre que allò que val per al castellà –la distinció de *v* i *b*– puga no ser-ho en aragonès. La reforma ortogràfica del Consello és criticable per diverses raons, però en cap cas no se la pot titllar de ridícula.

Se'n ridiculitza també la formació de neologismes: en els primers anys de les reformes del Consello és proposà de dir *fablaluén* en comptes de *telefono*, però aviat es va retirar per que passés el que realment ha passat amb *animal tetador* per *mamífer/mamífero*. Aquí hom s'hi ha rabejat, mostrant aquest mot com el súmmum del ridícul.

Pero ni *fablaluén* ni *animal tetador* tenen res de ridícul: són exemples d'uns altres procediments per a crear neologismes: mentre determinades llengües, i entre elles la castellana, tendeixen a crear neologismes a partir del grec i del llatí, d'altres ho fan a partir del propi vocabulari –com és el cas de l'alemany *Fernsprecher* (= *fablaluén*) o *Säugetier* (= *animal tetador*). De ridicul pонт, d'autoodi molt.

Artur Quintana

[Publicato en *Diario de Teruel* o sábado 4 de febrero de 2012]

articles d'opinió

Incunables

Cuando se publicó *Sospiros de l'aire* en 1971 yo no sabía que en Aragón se hablara otra lengua distinta del castellano. Fue como una revelación, el descubrimiento de que Aragón era mucho más rico y plural de lo que nos habían enseñado hasta entonces.. El libro parecía dondenado a pasar sin pena ni gloria: ni siquiera lo avalaba una editorial de postín, sino que lo publicaba una Caja de Ahorros en una edición rara, corta y naturalmente mal distribuida. Pero la noticia de la publicación de un libro en aragonés corrió de boca en boca y aquellos poemas de Francho Nagore se hicieron populares. (Cuando digo populares quiero decir que los leeríamos con suerte un centenar de personas, pero eso era mucho a comienzos de los años 70). Los jóvenes de entonces habíamos perdido los vínculos con quienes habían estudiado o utilizado la vieja lengua aragonesa años atrás (pienso en los esfuerzos que realizaron Moneva, Alvar, Arnal Cavero o Veremundo Méndez) y el libro de Nagore, humilde y silencioso, era un nuevo punto de partida en la defensa de una lengua que agonizaba casi sin remedio. Al año siguiente, la colección El Bardo publicaba en Barcelona *No deixez morir a mia voz*, de Áñel Conte, profesor por aquel entonces de historia en L'Aínsa. Ahora ya la editorial era de prestigio, el autor tenía una mayor recorrido, el libro se veía en las librerías y los versos de Conte se convirtieron pronto en un libro de culto entre quienes defendían la cultura aragonesa en todas sus manifestaciones. Fueron estos dos libros memorables los incunables del aragonés moderno. Después llegarían otros muchos, pero ellos fueron los precursores, los primeros que abrieron el camino a la recuperación de la lengua aragonesa y su particular y enternecedora Biblia de Gutenberg.

José Luis MELERO

[Publicato en *Heraldo de Aragón*, 16.02.2012, cuaderno de Artes & Letras, p. 2.]

creyazión literaria

A bida d'o pastor d'antes

Me gusta escribir romanzes
y al final me se ha ocurriu
dedicar-le este a o pastor,
lo tiene bien mereziu.

Pasa desaperzibiu,
pero no se lo mereze,
por a bida qu'este lleba
y o muito que padeze.

Sin fiestas ni bacacions,
ni domingos pa guardar,
frío, calor, agua u niebe,
o pastor siempre a soltar.

Ellos piensan cada nué
t'onde llebar o ganau
pa poder pasar o día
y esté bien alimentau.

Hai presonas con carrera,
y ye porque han estudiau;
o pastor tamién la tiene
y nenguno l'ha enseñau.

Enseñar bien a os perros
que tengan conozimiento,
pa que no baigan mu fuertes
pero tapoco mui lentos.

Si una obella está mala,
o pastor sabe pensar
si ye peligro espelletar-la
u si se pue aprobechar.

Bellas amejor cochían,
penan muito pa andar,
pronto las bey o pastor
y las tiene que curar.

Yerbas que son peligrosas
y puen matar o ganau,
o pastor tamién lo sabe
y las lleba ta otro lau.

Fan de beterinarios
cuando llega a ocasión,
curan patas, curan güellos,
tamién dan bella indezión.

Bellas bezes les ha tocau
todo o día boira preta,
zierzo frío, poca yerba
y dormir n'una caseta.

Igual abeba bel día
que o tiempo les plebeba;
aguantar l'agua s'ha dicho,
otro remedio no abeba.

Bellas obellas que paren
y no quieren a o cordero,
pero allí está o pastor
que tiene que recoger-lo.

Lo tiene que recoger
y lo tiene que limpiar,
luego buscar a su madre
que o cordero ha de tetar.

Se pena muito aguantando
as inclemencias de o tiempo:
ninguno quie ser pastor,
allí tenemos o ejemplo.

Presonas que no han penau
ni han bisto salir o sol,
t'enteras que les dan premios
u salen en a televisión.

As medallas de treballo,
si a alguno le'n tien que dar,
o pastor será o primero,
si no ye así lo ferán mal.

Ye que nos crían a carne
que tenemos pa comer,
a todos nos sabe güena
en guiso, brasa u a sartén.

De dizir-lo a bibir-lo,
ye una diferenzia grande;
para fer-nos una idea
pues con esto ya nos bale.

Lorenzo CEBOLLERO
[Arguis]

De pastors
y as polidas flors que cuse o yermo.
Arrozegando ausenzias.
Yo amaba ista tierra.
Eba naxito en ista tierra.
Yera o bardo bantato
En os camins cuan remata la tronada
y o zielo
Chuga con chigans mirallos de colors,
yera una boz
De cardelina achuntando-se
a la boz d'o mío pueblo.
En un inte bebié os suenos d'a mía tierra,
Sintié a frescor en os labios
d'os suyos aspros peitos: Aragón.

Chuan Chusé Bielsa

Dos poemas de Chuan Chusé Bielsa

BARDO

Yo amaba ista tierra. Yera o bardo
Familiar, a luz chiqueta entre o misterio.
Eba naxito en ista tierra.
No dizié cosa.
Dengún no diz cosa cuan naxe. Biene
Sangre sobre sangres
u sangre entre lienzuelos.
En un inte s'alienta
un biello aire carnal.
En un inte s'ubre o corazón d'os aniellos.
D'un árbol móvil, de radiz oszilán.
En un inte s'ubren os güellos d'a tierra.
Y beyemos o mundo
por finestras de mitos.
Yeran tronadas eternas.
Yeran as mans d'una biella.
Intimas mans en l'alda negra
aparando largos truenos.
En silletas, carreras aparando como sacas
Gotillons que son muertos
palpiando los ricuerdos.
En o polbo, aireras
que tornan con olors de lanas.
D'obellas d'os disiertos, arrozegando canta.

PARADISO

Os fosals son casas de zenisas abandonadas,
grisias.
As purnas de luz d'o sol no i son astí.
A luna aguaita blanca as guambras d'as losas
frías.
Os pais que asperamos beyer son en estrels de
reflexo lexano, luz que tremola dende o país
d'os bibos.
Nusatros aquí, embolicaus en carne como abri-
gallo ta un furo ibierno.
Nusatros aquí cara ta días y nueis que se mez-
clan en una mesma negror.
Inútil cualquier deseyo de carne que solo
confirma as angunias continuas.
Inútil o deseyo de mans, de bocas, que parixen
nafras en iste uniberso.
Toz güellamos ta o sol, ta la luna, que remanen
allenos a piedras funerarias.
Toz güellamos enta la cara perdida d'o sol que
son os sers muertos y asperamos en almas que
beilan por d'enzima d'o peso d'a Tierra.
As yerbas ondulan como plachas amorosiando
os fosals d'espilletos.
No i son ya as imáchens de camins.
Os camins siempre rematan en pueyos u tucas
que aculle o zielo.
En yermos sin pasos que aculle o perdón.

Chuan Chusé Bielsa

Os alavez d'a nazió aragonesa

En o lumero 29 d'a rebista *El Ebro* publicato ro 5 de mayo de 1920, Gaspar Torrente remeraba o siguién episodio d'a sua bida, en o tiempo d'o suyo serbizio militar (entre 1909 e 1912), cuan encara no eba empezipiato publicamén a sua melitzia aragonesista:

«En las aburridas horas de lectura que uno pasa en el servicio [militar], donde se preguntan y leen artículos de la Ordenanza y se refieren ejemplos de patriotismo, de heroicidad, de valor; de amor a la patria nativa yo, verdaderamente, a veces me sonreía, no podía menos, porque deslindaba en muchos casos la patria del contenido de la conversación, hasta que llegó cierto día, en el campo de instrucción, que me cogió por su cuenta el teniente instructor y, llevándome en un rincón del campo, me dijo que, sin miedo alguno, sin perjuicio mío, dijera qué significaba la sonrisa mía en las horas de lectura al hablar de la patria y de su voluntad, a lo que yo, [con] confianza en su caballerosidad, respondí de esta manera:

“La Patria, dicen ustedes, y así se nos enseña a decir; es el pedazo de tierra donde nacemos, y es verdad; mi patria es Campo, el pueblo donde nací pertenece a la comunidad de Aragón porque es de Sobrarbe, por consiguiente mi patria política es Aragón y solamente Aragón, lo mismo si es española como si fuera francesa el día de mañana o llegara a ser norteamericana dentro de medio siglo, Aragón no por eso dejará de ser Aragón y mi patria siempre será la misma: Aragón.”

La respuesta del digno oficial no fue otra que la de extenderme el brazo sobre mis hombros y decirme que el único patriota de la Compañía era yo...» [1]

A pertinenzia d'ista zita (primera manifestazión conoxita d'a bocazión e d'o pensamiento aragonesista de Gaspar Torrente) ta introduzir iste ensayo se troba en a costatación d'un feito común á tantas chenerazions d'aragoneses á ro largo d'os tres sieglos d'inesistenzia d'un Estato aragonés. Iste feito ye, ni más ni menos, que a persistenzia d'a identidá esferenziata d'a comunidá humana que clamamos “Aragón” u “os aragoneses, as aragonesas” como pue-




Gaspar Torrente en 1911, cuando realizaba el servicio militar en Alicante.

Gaspar Torrente en a mili.

blo á ro largo d'os sieglos e d'as zercustanzias. Ista identidá ye estata mantenita por denzima de cambeos de coyuntura, de rechimen político u de formula de gobernación (monarquía, república, territorio conquistato por castellanos u franceses, probinzipia, rechión, almenistración zentralista, comunidá autonoma, ezetra). Gaspar Torrente reflexa en en iste episodio nomás que o que a cheneralidá d'os aragoneses e aragonesas yeran antis d'ausidir-se a independenzia d'Aragón, son encara e -á o que se beye- quieren continar estando en o esdebenidero: aragoneses e aragoneses.

A esistenzia d'a nazió aragonesa no ye pas una situazión que biene determinata por tal u tal decreto gubernamental u por qualche sentenzia d'un trebunal constituzional. Ye un feito d'a reyalidá, que no puede zircunduzir más que por a boluntá d'as chens que, como pueblo, continan mantenendo a sua identidá ancestral por denzima de tot e que prexinan que, como tal pueblo, constituyen un socheto



Chunta Direutiba d'Unión Aragonesista (c. 1930).

con personalidá política propia tetular de dreitos colectivos.

Anque as discusions nominalistas en a bastida d'o Estado español sobre a personalidá política d'un pueblo e a suya carauterización como nación yen estatas e continarán estando tan enrebullatas como cualesquier atra buena discusión bizantina, cal siñalar –¡ye de dar!– que o que comunmén gosa azeutar-se entre oserbadors esternos de todas as culturas e contestos ye que tot pueblo que á trabiés d'os sieglos, fueras d'a suya situación de pendenzia u independenzia con respecto á otros poders, se reconoxe de traza cheneral, consistén e contina como un pueblo endibidualizato y esferenziato d'os otros, ye una nación.

Tal ye o causa d'a nación aragonesa, fueras de que ixa denominación li cuaque u no pas á constituzionalistas (españolistas, profes), ziudadanos d'o mundo, endibidualistas á ultranza, chens d'orden u apoloquetas d'o pensamiento amesurato e politicamén correuto, seigan aragoneses u foranos.

Ixe feito istorico e ixa autualidá de querer seyer que siñalaba ra base primera ta la redazón de l'Estatuto d'Autonomía d'Aragón de 1936 ta definir a bichenzia d'a personalidá d'Aragón muitas añadas dillá d'a destruición d'o Estado aragonés en 1707, tienen

a mena de fuerza que prebalexe perén sobre cualquier sentenzia chudicial u decreto gubernamental: o pueblo d'Aragón, a nación aragonesa, no s'ha delito en a *fondue* d'una nueba identidá española que aiga remplazato e meso en o caxón d'a Istoria pasata a boluntá d'as aragonesas e aragoneses de continar estando o que siempre son estatos. Bien poderba aplicar-se-nos o lema nazional d'un país como Lucsemburgo: "Queremos seguir estando ro que somos" (*Mir wëlle bleiwe wat mir sinn*). Igual como os lucsemburgueses lo proclaman, asinas l'han quiesto e quieren os aragoneses e aragonesas. Por tot ixo, e tamén por muito más que ixo:

Aragón ye Nación!

A conzenzia de cada pueblo sobre a suya identidá e nazionalidá s'alazeta de traza diferen. Nezesariamén bi n'ha tantos d'exemplos como nazions, pues cada una d'ellas ye plegata á ra suya configurazión e madurazión como resultado d'esperenzias que lis son propias e difizilmén trasferibles, siquiera parzialmén. Ista costatazión ye consecuén con a propia lochica d'a esistenzia de nazions esferenziatas: lo son e tienen identidá distinta prezisamén por estar o resultado d'a determinata esperenzia colectiva concreta d'una comunidá humana á trabiés d'os sieglos. Por ixa razón, os alazez sobre os que s'aposa ra

identidá nazional d'un pueblo no son ni di-reutamén aplicables á atros ni entrepitables d'a misma traza. Por exemplo, o peso que o fautor lingüístico tiene en a definición d'a identidá nazional no ye igual ta un aragonés que ta un catalán u un galés, á causa d'a esperenzia e trayectoria istorica diferén con respeuto á o feito lingüístico de cadaguno d'istos pueblos. Antimás, a cualidá d'iste u cualesquier atro fautor no ye analizable deseparatamén de toz os demás, ya que toz interautúan entre ellos e se manifiestan en o animo coleutibo en diferén proporción, con diferén fuerza e con diferén senificación en unos pueblos u en atros. A consecuenzia ye tan lochica como empiricamén constatable: no esisten dos nazions iguales e, por o tanto, no esisten dos nazions con os mesmos fundamentos d'a suya identidá nazional. E, á ra luz d'isto, ye de dar que as simplificacions, as estrapolazions e as teorías nazionals basatas en clichés e simplificacions no solo son fuens inacabables de conflictos, sino que empachan una aprosimación seriosa, desapasionata y espullata de prechudizios ta o conoximiento, azeutazión e chestión d'a reyalidá plurinacional d'o nuestro mundo.

En tota identificación d'os alavez d'una nazionalidá ye d'amenister reconixer que no existe un lumero finito de fautors, e que en differens epochas ístos pueden bariar en cuanto importanzia e mesmo estar beluns sostituyitos en relebanzia por atros nuebos. Manimenos, á trabiés d'a propia introspección endibidual, pero de traza más publica á trabiés d'as reflesions d'os differens teoricos que bi aiga abito d'a identidá nazional de cada pueblo, ye posible cuan menos enunziar aquers fautors que pesan de forma más determinadera en a conzenzia d'estar d'una comunidá nazional. En Aragón, tenemos a fortuna d'aber-ne tenitos arrienda. Tornando á zitar á Gaspar Torrente, “*La nacionalidad aragonesa, mal que pese a los maliciosos y a los ignorantes, ha sido proclamada por hombres modernos como son y han sido Joaquín Costa, Giménez Soler, Marraco, Sánchez Ventura, Ángel Samblancat, Minguijón y tantos otros que no están poseídos de ninguna ignorancia*” [2]. Ixe “tantos otros” no ye una balloquería por parti de Torrente, e podérbanos adibir á ros ementatos por el

(encluyindo-bi á el mesmo) á Julio Calvo Alfaro, José Aced, Isidro Comas, Mariano García Villas, Mariano García Colás, ezetra. Ixo si nos referimos nomás que á os contemporánios suyos, que en lumerosos escritos que nos son plegatos de pensadors más antigos (por no fablar de toz os testimonios zercustanzials que se troban en os documentos antigos) se tresmina a esistencia e pleno vigor d'ixa impronta identitaria aragonesa, asobén con fuertes tintes rebendicativos.

Como síntesis d'ixa tradición teorica sobre os alavez d'a identidá aragonesa feita por os aragonesistas de fa un sieglo, podemos dizir que ísta se sustiene en tres pilars esenzials que, antimás, son ligatos entre ellos en una relación causal que prebaré d'esplanicar:

1. O feito istorico. Aragón estió un condato, un reino, un Estado independié, con una singladura istorica de nueu sieglos á ro largo d'a cual se farchó una organización política (pautista/parlamentarista), churidica (foral) e instituzional (Cortes, Deputación, Chustiziazgo) que, sobre tot á partir d'os sieglos XIV-XV, distinguió como un feito esferenzial prauticamén inaudito á relazióñ d'os suyos abitadors con respeuto á os poderes publicos e a traza de gubernar-se o país, una reyalidá bien diferén d'a que rechiba en a cheneralidá d'os demás Estados europeyos d'os sieglos pasatos. Chunto á ixo, a senificación d'a Casa Reyal d'Aragón, d'as chestas reconquistaderas, d'o imperio mediterranio, d'os suyos simbolas, éroes, tradizions, leyendas, ezt. Tot quedó en a memoria coleutiba que se trasmitió entre chenerazions d'aragonesas e aragoneses, alto u baxo arrodiata por os mitos, pero mitos aposatos sobre feitos istoricos reyals que toz han benito esfendendo con falera como o legato común d'iste pueblo á trabiés d'os tiempos.

2. O dreito foral aragonés. Ye consecuenzia d'ixa tradición sozial e política (constituzional) istorica d'Aragón. En o esmachinario coleutibo aragonés encara perbibe (anque pro esbufalita) ixa noisión d'espezifizidá esferenzial ementata en l'alazet anterior: furos e libertaz, dreito de manifestazióñ, o Chustizia, e os acontezimientos sangrientos que á cuenta de tot ixo acayeziron. A perbibenzia d'o dreito zebil aragonés dimpués d'os decretos de zircunduzión foral de 1707 e 1711 dica os nuestros días, anque no son sino una mera frazione d'ixe ordinamiento, ha tenito una importanzia esenzial en mantener biba a memoria, sisquiera borronuta, d'a secular espezifizidá constituzional d'a comunidá nazional aragonesa. O Dreito zebil aragonés esdebenió

ro testimonio encara bibo que ha feito remeranza d'ixos fueros e libertaz que, en a Edá Moderna yeran bistas dende difuera d'Aragón como "prebilechios" d'os aragoneses. En definitiba, o dreito zebil aragonés ye estato o único bestichio material bibo en o que ha puesto refirmar-se ixa "continidá d'Aragón sin Aragón" en os tres zaguers sieglos.

3. A boluntá d'estar. Cuan o feito d'estar un Estato esdebiene Istoria á partir de 1707 e d'as suyas instituzions forals nomás queda o repui d'o dreito zebil, mesmo espullata d'a suya constitución política remane a nación. A boluntá d'estar aragoneses s'ha mantenito á trabiés de tres sieglos mesmo á tamas d'a empenta d'o nuevo Estato español, que ha sostituyito á o Estato aragonés, en asemilar os aragoneses á una nueva ciudadanía española. Dica os nuestros días a mayor parti d'as aragonesas e aragoneses ha mantenito a suya identidá, mesmo si güei en gran mida ísta se manifiesta entre a población aragonesa sin escuentradización u confitó con a identidá española. A deboluzión d'una parti limitata de l'autogobierno dende a transición democrática ha estableto cuan menos entre a población aragonesa un referén nezesario ta o refirme d'a nozión de comunidá (nacional) como teatular de dreitos políticos. Pero en ixas 274 añadas trascorritas entre 1707 e 1981 (aprobación d'o suyo primer Estatuto d'Autonomía) Aragón ha continato esistindo en os sentimientos d'os suyos abitadors, alimentato por a flama d'a suya boluntá de continuar estando ro que sempre yeran estatos: aragoneses, aragonesas.

Os demás fautors que sustentan cualquier nozión d'identidá nazional (luenga, folclore, cultura, tradizions, ezetra), en estar importans, partezipan de traza más secundaria en a nozión de reconoxer-sen as aragonesas e aragoneses como tals.

De l'anterior relación d'alavez d'a identidá nazional aragonesa contemporania tamién se deduze un orden secuencial, d'alcuerdo con o cual o primero d'ellos (un feito istorico, orochinario e constituzional) queda zircunduzito en 1707, e da piet á ro segundo (un feito churídico –u dito más apropio, foral– que li perbibió) e íste á ro terzero (un feito nazional sustentito por a boluntá d'os miembros d'ixa nazionalidá istorica). Se trata d'un prozeso en o que cada "adelgazamiento" d'o feito istorico de partita, da puesto á un atro alavez identitario. Asinas,

os tres pilars esenzials d'a identidá nazional aragonesa responden á una eboluzión en a cual a destrucción d'os elementos constituzionals e instituzionals orochinarios produzita por l'azión despotica d'os prenzipes absolutistas primero e, dimpués, por a creyazón *ex novo* d'una nazionalidá española con bocazón asemiladera e sostituyidera d'a identidá aragonesa (e as de totas as que cayoron baxo ra suya dominación), ba espullando progresibamén á os aragoneses d'o tarabidato instituzional que contrebuye á sustener a suyo sentido de pertenencia á una comunidá nazional. Como consecuenzia, a reyalidá incontestable d'a esistencia secular d'o Estado aragonés plegará dica nusatros trasformata en feito istorico; o repui d'a perbibenzia d'o dreito foral zebil, con o tiempo, esdebiene un alavez esenzial d'a identidá como reyazón á l'asemilazión españolista que china chana ba desembolicando-se; e, tot de bez, como precario ereu d'as glorias pasatas, as aragonesas e os aragoneses se rebendicarán identitariamén (espezialmén en momentos de deficitá) á trabiés d'a suya mera boluntá de continuar esistindo como aragoneses.

En ista eboluzión d'as ideyas e sentimientos aragonesistas a remeranza d'o feito istorico resulta esenzial ta alimentar os atros dos alavez, e muito espezialmén o terzero, que, á mida que pasan as decadas e os sieglos, resultará d'una grandisma importanza. Efeutibamén, a eclosión d'o sentimiento popular aragonesista en as zagueras añadas d'o franquismo e a transición democrática estió dezísiba (mesmo á penar d'os entrepuzes que se i metioron dende drento e dende difuera d'Aragón) ta azeder á l'autonomía e otener una deboluzión parzial d'a suya capazidá lechislatiba, nezesaria ta aconseguir esbiellar e desarrollar o ya prou anacronico dreito zebil foral aragonés. Asinas pues, o feito istorico alimenta ra boluntá d'estar e ísta ye estata nezesaria ta que en o prozeso de deboluzión parzial que suposó o Estato d'as Autonomías, Aragón estase reconoxito como comunidá. En aconsegiundo-lo, recuperó a suya capazidá lechislatiba e instituzional ta esbiellar e fer rebiscolar ixe binclo que yera o dreito zebil aragonés, una mena de precario puen de continidá foral propia entre o reino antiguo e a comunidá autonoma autual.

O feito istorico resulta, pues, esenzial en o desarrollo d'ixe fenomeno de "esistir Aragón sin Aragón" por cuasi tres sieglos e que

agora denominamos “aragonesismo”. Pero, ¿cuáls son os referens concretos d'ixe feito istorico que, dillá d'a remeranza global d'a Istoria d'Aragón, nutren más intensamén o ideyario aragonés e aragonesista con o que se sustenió a boluntá d'estar d'as aragonesas e d'os aragoneses por 274 añadas?

Parixe esclatero que en a conzenzia identitaria d'a poblazión aragonesa as referenzias á o feito istorico son as más abundans anque, cada begata más inconcretas, menos detallatas... á la finitiba, más débils, á causa en gran mida d'un contesto cheneral (no solo que aragonés) en o que as amostranzas en o campo d'as umanidaz s'ha quiesto que pasasen á un segundo plano en a formazión d'os nuestros ninos, chóbens e mesmo tambiéen os adultos. Con tot e con ixo, as nozions d'un reino, de reis, cortes e chustizias, d'unas “glorias” pasatas, d'una pugna por as libertaz con os reis absolutos (os dos más siñalers de nombre “Felipe”) castellanos u castellanizadors e a imposición d'a fuerza bruta sobre a razón e a legalidá..., tot ixo –con errors, desacherazions, mitos e rabotadas d'argüello irrazional– ye rebiscolato encara por as aragonesas e os aragoneses. E lo fan mesmo á penar d'a suya dificultá autual ta plegar á concretar feitos e datos que, por no rezibir-los como estabar de dar d'o sistema educativo, os endibuidos más motibatos han d'esforzar-sen en trobar-los por a suya propia cuenta. Estabar de dar un estudeo soziolochico sobre os elementos que configuran o ideyario identitario aragonés u aragonesista d'a nuestra poblazión ta poder

conoxer con mayor prezisión istas nozions d'o imachinario coleutibo aragonés, pero a experienzia cutiana nos endica que en gran mida o feito istorico continua sustenando con fuerza a boluntá d'estar.

Intresa por ixo afondar en as radizes istoricas concretas d'a conzenzia identitaria aragonesa e, sobre tot, dibulgar-las entre a poblazión si queremos mantener zereña a nuestra boluntá d'estar. Dillá d'os mitos e leyendas, tenemos que construir un aragonesismo sereno e sano que parta d'o conoximiento de l'orichen concreto d'as ideyas que to ro largo d'as Edaz Meya e Moderna fuoron farchando a personalidá nazional aragonesa. En o centro d'ixa personalidá se troba tota una tesis política que ye o prenzipio basico cheneral de por qué os aragoneses se gubernaban como se gubernaban, de traza tan differéntia como en feban a gran mayoría d'os Estados europeyos d'o Renaximiento. A cultura política d'a nazión aragonesa antiga e as suyas premisas constitucionals grabaron en a conzenzia d'os aragoneses –como con un fierro rusién– un fortismo sentito d'espezifizidá como pueblo, como comunidá nazional. Ixa remeranza, ixa marca indeleble, ye a que ha mantenito a nazionalidá aragonesa biba os tres sieglos trascorritos dende a suya supresión “oficial” por os decretos d'os nuestros imbasors. Puesto que somos una nazión de 1.200 añadas de singladura, si queremos replecar en a suya entegridá o cuerpo ideyolochico de l'aragonesismo tendremos que filar no sólo que enta os suyos esponens más reziens, sino



**Librería
Anónima**

c/ Cabestany, 19
E-22005 UESCA

Tel. / fax 974 244 758
Adreza eleutronica:
info@libreriaanonima.es
www.libreriaanonima.es

que tamién caldrá buscar os suyos alavez en as suyas más remotas radizes.

A primera d'ixas radizes estió –en a mía opinión– a monarquía que, debán d'a suya precarieadá, os reis aragoneses queríron beyer lechitimata por Dios á trabiés d'o suyo menistro en a Tierra: o Papa. Ta os antigos dirichens aragoneses, emparentar con a retalinia reyal de Pamplona (por o matrimonio d'Andregoto –eredera d'o condato d'Aragón– e o rei pamplonés García Sánchez, en o año 925) e tornar a esdebenir independiens de Pamplona en 1035 con un capitoste –Remiro I– que, como fillo d'o rei Sancho o Mayor de Pamplona, poderba proclamar-se rei por estar filho e nieto de reis, senificaba tota una proclamazión d'independenzia con respeuto á o inicial tutorío d'os frances e o posterior d'os pamploneses u nabarros. Si, antimás,ixa premazera iniziatiba de proclamar-se rei quedaba emologata por a dibinidá, a oposición de terzers á azeutar a independenzia total d'Aragón de cualesquier poder terrenal se trobarba con entrepuzes de considerazión en o contesto diplomatico e cheopolítico d'ixa puenda; d'astí a infeudazión que Sancho Ramírez fazió d'Aragón á o Papa en 1068. O gran salto que Aragón dio á partir d'a creyazión d'a casa reyal d'Aragón e to ro largo d'o sieglo siguién como gran potenzia peninsular, asinas como a gran espansión que alcanzó con o suyo empente reconquistador fizieron d'a reyaleza o prenzipal referén codesionador d'os grupos umanos que, cada begata en mayor lumero, s'organizaban baxo ro liderazgo d'a corte aragonesa. Asinas pues, a constituzión d'o Reino d'Aragón senificó l'azesión definitiba á ra independenzia d'o país e, á no guaire tardar, tamién esdebenirba o más platero esponén d'a supremazía e dominio d'Aragón sobre atros Estatos e territorios.

O segundo referén istorico que considero esenzial ta ra costrucción d'o edifizio ideolochico de l'aragonesismo preterito, enzarrato en o pilar identitario autual d'o “feito istorico”, estió a compilazión d'os Fueros d'Aragón de 1247. Intresa destacar en tot iste prozeso, que engueró Chaime I con a combocatoria d'as Cortes de Uesca de 1246, dos aspeutos de relevanzia: a formulazión compilata d'unos fueros comuns de toz os aragoneses (con as espezifizidaz

deseparatas d'os fueros de Teruel e Albarrazín), como ordenamiento churídico cheneral d'o país, e a reyazión d'as “fuerzas bibas” d'o reino ta pribar que ixe corpus normativo senificase o prenzipio d'un prozeso de suplantazión d'una foralidá de base autoctona e impronta consuetudinaria por o dreito romano e as tesis zesaristas. D'una traza u atra, á ro largo d'una prautica cutiana, e d'un pulso entre as conzeccions indichenas u foralistas e as direutamén ispiratas en o dreito romano que duró muitas decadas, e sin custionar que esistió una permeabilidá entre as dos posturas antagonicas que encapezaban o rei e o “reino”, o feito zquiero ye que prebalexió o segundo sobre o primero. Á radiz d'ixo, as normas que eban de rechir as bidas d'as aragonesas e aragoneses aberban de surtir en o suzesibo d'o “dreito natural d'a tierra”, no pas d'a boluntá (mesmo si se prexinaba ispirata por Dios) d'un prenzipie d'o que promanan toz os poders d'o Estado.

Terzer referén indispensable de l'aragonesismo antiguo: o Prebilechio Cheneral d'Aragón (de 1283, reparato en 1325). Se trata d'un berdadero testo constituzional, a Magna Carta d'Aragón, firmata 68 añadas dimpués que a d'Anglaterra, pero que contiene desposizions de muito mayor amplaria que ísta, ya que estatueze limites á o poder reyal, salbaguardas d'os dreitos endibiduals fren á ras autuazions d'as autoridaz reyals, o sozmetimiento d'o rei á l'ordinamiento foral d'o país, a obligazión de que o rei comboque Cortes si quiere lechislar u pillar dezisions de gran alcance ta ro país, o requi-



sito de que chure os fúeros, prebilechios, libertaz, usos e costumbres aragonesas ta estar reconoxito como rei por os reinicolas, cuala representación s'arrogan as Cortes d'Aragón, eztra. Fruto d'a rebelión de totas as fuerzas bibas d'o reino cuen-tras albitraredaz de Pietro III o Gran, se trata d'o testo constitucional que fixó os prenzipios reutors d'o equilibrio de poders en o país. D'o Prebilechio Cheneral ranca a ebolución d'o país enta ro estato de cosas que iba á fer d'Aragón una *rara avis* entre a gran mayoría d'os Estatos europeyos.

Con o Prebilechio Cheneral se refincó a importancia d'o Chustizia d'Aragón (o cuatreno referén que consideraremos), figura creyata en 1265 como chuez meyo en as disputas entre o rei e a nobleza, e que á patir d'alabez empezió a suya ebolución como chuez de guarenzias, albitro institucional e instancia interpretativa de l'ordinamiento foral (una mena de trebunal constitucional). Ixe caráuter constitucional, reconoxito por toz, fazió que o Prebilechio Cheneral s'incorporase á os Fúeros d'Aragón, e que como tal lo emologase Pietro IV o Zerimonioso en 1348 mientras destruyiba o Prebilechio d'a Unión, que representaba nomás os intereses de clase d'un seu-tor rebelde d'a nobleza. O Prebilechio Cheneral d'Aragón, d'aber estato feito en Franzia u Anglaterra ese estato inmortalizato en mils de libros, obras d'arte e películas. O Prebilechio Cheneral d'Aragón tenerba que estar amostrato en as es-cuelas, e no solo que en as d'Aragón.

O Chustiziazgo, como cuatreno referén ala-zetal d'o feito identitario aragonés istorico, no escopenzipia á estar ixo que fazió d'el tot un mito nazional d'os aragoneses que á partir de l'atorgamiento d'o Prebilechio Cheneral d'Aragón, anque a figura d'iste chuez meyo estase estatuezi-ta 17 añadas antis por as Cortes d'Exeya. Con o Prebilechio Cheneral o Chustiziazgo escomenzi-piará á eboluzionar á ro largo d'o sieglo XIV dica ocupar una posición zentral en a interpretación d'os fúeros á trabiés d'a prautica chudizial, que quedaba recullita en as clamatas "Oserbanzias". Drento e arredol d'a corte d'o Chustizia s'achuntó tota una clase profesional de letrudos en fúero que á trabiés d'as Oserbanzias yeran "creyando" fúero difuera d'as instituzions lechislatibas por antonomasia: o rei e as Cortes. Isto cheneró un conflicto que s'estralió con una solución que, sin dembargo, considero que ye o zinqueno peirón d'a relación de referens basicos de l'aragonesismo istorico que soi proposando: o reconoximiento como prenzipio constitucional d'o reino d'o Fúero de Sobrarbe. En tornando á o Chustiziazgo, en o que

li toca como referén de l'aragonesismo, será o martirio d'o Chustizia Chuan de Lanuza o Mozo o 20 d'abiento de 1591, á mans d'os imbasors castellanos nimbiantos por o rei, o episodio d'a Istoria d'ista institución que más fundamén chupió a concenzia aragonesista d'a poblazión, alquirindo ya trazas de mito cuan un sie-glo dimpués de l'acotolamiento d'a mes-ma, os teoricos europeyos d'a reboluzión burguesa e liberal trobarán en el a suya ispirazión en relación con a creyazón d'os sistemas de guarenzias d'os dreitos e libertaz endibiduals que tot Estato de Dreito amenista ta poder estar mereedor de tal considerazón. No ye pordemás que en as tesis d'os teoricos constitucionalistas d'os sieglos XIX e XX se cudise a frase de que "un Estato de Dreito bale ro que balen as suyas guarenzias". Asinas, o Chustizia d'Aragón, os prozesos forals (manifestación, embargo, aprensión, im-bentario, emparamiento) que guarenzia-ban os prozedimientos sobre personas u biens e o suyo paper prenzipal en a esfensa de l'ordinamiento e a limitazón d'os poders estioron (mesmo si mitificatos) ispirazión ta ra costrucción d'os sistemas democraticos autuals, tot de bez que han alimentato poderosamén os sentimientos aragonesistas dica os nuestros días.

Os Fúeros de Sobrarbe, zinqueno fundamento istorico que tamién considero que ha nutrito l'aragonesismo dica os nuestros días, son una imbenzión que ranca d'una leyenda de probenenzia na-barra sobre un suposato orichen pautato d'a reyaleza d'Iñigo Arista, primer rei de Pamplona (de do promana a dinastía aragonesa), pero que surte con fuerza en metá d'a disputa entre o rei e as Cortes en o sieglo XV sobre á qui corresponde a potestá de formular o fúero u, en otras parolas, de lechislar. O terzero en ista discordia yera o Chustiziazgo, con a suya prautica de creyar fúero á trabiés d'as Oserbanzias. A soluzión á tres bandas consistió en a formazión d'una comisión d'as Cortes, pero presidita por o Chustizia Martín Díez d'Aux, ta fer una colección ofizial d'as Oserbanzias, con a fin d'incorporar-las á o corpus d'os Fúeros d'Aragón y emparchar que, á partir d'ixe inte, se continase creyando fúero por meyo d'Oserbanzias. D'atro costato, Ioan Ximénez Cerdán, qui

estió ro Chustizia predezesor en o cargo de Díez d'Aux, escribe á íste una *Letra Entimata* (o 25 de febrero de 1435) en a que manifiesta a suya protesta por o suyo amarguinamiento personal en a codificación d'as Oserbanzias pero en a que tamién esplanica que en Aragón a creyazón d'os fueros s'ha feita dende l'orichen d'o reino por a concorrenzia d'o rei e d'a nobleza militar (representata en o sieglo XV –anque de conchunta con os cleigos, infanzons e ziudaz e comunidaz– por as Cortes), e que en ixe pauto ya s'estatuezi a figura d'o chuez meyo u Chustizia. Ixa teoría d'a lechitimidá d'o poder, cal dizirlo, no zerculaba solo que por Aragón en ixa puenda; pero en Europa prauticamén solo trunfó que en a Corona d'Aragón (y en Anglaterra, de traza definitiba, nomás que en o sieglo XVII). Ximénez Cerdán, dende o suyo retiro d'Añón, aconsiguó con o suyo escrito (que tamién s'incorporó á os Fueros d'Aragón) consagrar a concepción pautista e parlamentaria d'o poder d'o rei e d'as Cortes apelando á una leyenda (que ya eba feito serbir antis o forista Martín de Sagarra e dimpués atros como Antich de Bagés e Gauberto Frabrio de Vagad) seguntres a cual, amán de l'Aínsa, en os primers tiempos d'a reconquista, se libró una difizil e dramatica batalla en a que s'aparxió á os aragoneses una cruz denzima d'una carrasca. Dimpués d'a miraglosa bitoria, os guerrers dezidioron eslechir entre ellos uno que estase á partir d'ixe momento o suyo rei, baxo unas condicions limitaderas d'a suya potestá cuala oserbanzia yera o unico tetulo de lechitimidá ta poder estar rei. Ye iste o mito d'os Fueros de Sobrarbe, d'os que se deduze que: (1) o rei nomás puede lechislar drento e con a concorrenzia d'o parlamento d'o suyo país; (2) a lechitimidá d'o rei se sustiene sobre un pauto con o reino por o que o rei ye l'almenistrador d'o intrés común e, por tanto, sempre ha d'autuar d'alcuerdo con l'ordinamiento foral (prenzipio de legalidá); e (3) a churisdición d'o rei ye plenamén legal nomás cuan íste chura o suyo sozmetimiento á os fueros d'o reino, dimpués d'o cual –e no antisrezibe o churamento de reconoximiento d'o reino á trabiés d'as suyas Cortes e de mans d'o Chustizia. A formula –tamién mitica– d'a chura de reconoximiento d'o

LETRA INTIMADA POR MOSSEN IOAN XIMENEZ CERDAN, A MOSSEN MARTIN DIEZ DAUX,

JUSTICIA DE ARAGON.

Al muy leñurable, e circunspecto varón, mosen Martín Díez Daux; Justicia de Aragon. Joan Ximénez Cerdán, maye de dies; prellida á vnuva lisoner, e placeres. Extendido lo por personas fidalgas, conos vos opinados, & colabradoras nucha saber de mi, ó de sus habitantes, e de mis legions; cosa aquél que de pronto lo ha en el lecho del persona, y de la tua calidad que dera davor tan grande a la que lo diera feysto, e otros del Regno, si los hayas mandado, e mandado á los prescres & amigos de aquél, pregece me testigadas que ver informes de las cosas subordinadas cosa aquél que de pronto regides e dico ofirlos lo queridas saber & entender. Porque viende ya vuestra respuesta e regides severo examinables, á presentes al Regno; los quales creys que procedent de voluntad de nuestro señor Dios; porque los de questo Regno havian memoria de aquéllos: e de la libertad que deven haver, e praticas de aquella, respondiendo a vuestras regidas & requeridas. Presentamente no nacida de la intencion e porquerazon: e como el oficio de Justicia de Aragon fue testido; e cosa aquéllos e fundamento, e principio del oficio; apres de los batallios de Aragon, qui de memoria de las pasadas que yo conozco, e mi lana aygo successivamente: e de habitantes en un villa, e habitante en court. E por loz del oficio de su generacion de cada uno, ó de algunos actos, estatutos, prerrogativas, & honores de ellos. E quanto se han servido las cosas subordinadas, e sozvendido por legado de regis Principes qui gobernaron el principio de su oficio; respondido por Felipe Pimentel, e Francisco. Porquiero saber como los Reges e Príncipes se devinan regir e gobernar, compuso aquél libro. El oficio del Justiciodo de Aragon (según la opinión de todos los

antigos) ha trabajado en aquella manera: Que como ciertas gentes lucisan conquistado cierta partida del Regno de los infieles en las Montañas de Soberole: e fuesen conuocas no lucrantes Gobernadores ni Regidor, e huiviendo entre si susytes questiones y debates: fue movido por algunos delos, que por exira la sabedoria, e prouez vivientes en paz que exceden Rego, qui los rego e gobierna: otros estuvieron que no lo dejara listo, qui contestar les ha cosa á lo que se daban. Qui lo daban al Rego en su Proyecto Social, el q' queria q' se regir, se lo prendia los mulieres, e los hijos, e los bienos: e querian sacar pozoz, e no fueron á tiempo. E credo seguramente, dijeron los que defendian Rego. Que furioso si se lastimo Rego, e qui nos gobernara todo el dia: uno á otros nos mataros, e robaremos. Porque havida gran alteracion, e deliberacion entre ellos, movidas por gracia de nuestro señor Dio, es por exemplo de Valente Matheo, en el libro de moderacion que un Rey claudio Thesopampa Rex Spartaniorem, tanto queria facer justicia, que entienda que por si mismo soy tra bastant. E yában que hovisera su Regno libre e shastato, eñido des problemas, con consejo de los quales, el e un successores hovisiera de fazer la justicia, e no sin ellos. E schisto hovisiera por su mulier, e su fillo: vñeron muy yna á el e reproducido muyz daños, q' no se havia feysto. A los q' q' querian q' se yndiera q' de allí ainst, el q' los sacava no lastimara el Regno tan blano, q' debolto como havia de primieren pero q' se lastimara tan durable, e cosa perpétua. Que aquél Regno era de mayor durada e man firme, que por malas justicias e errores, se regio: car los q' q' tienen contra rason e violentamente, no son durables. Qui nacieron violencias perpetuas. E por aquella razan, los subordinados Conquistadores del Regno de

11

Letra entimata (1435).

rei sintetiza o prenzipio por o que os aragoneses e aragonesas se gubiernan: *"Nos, que somos tanto como bos, e chuntos más que bos, bos emos eslechito como o nuestro Siñor e Rei si conserbaz os nuestros dreitos e libertaz; e si non, non"*. Tota ista teoría aragonesa d'o poder, mesmo si basata en leyendas e falsos prezedsens (o Fuero de Sobrarbe ye pura imbenición), consagraron en a reyalidá un rechimen politico en Aragón en o cual –á esferenzia d'o que pasaba en Castiella, do "a boluntá d'o rei ye lei"– o poder d'os prenzipies teneba limites, a lei solo podeba promanar que d'o rei-en-parlamento e o monarca no podeba autuar á o suyo albitrio e difuera de l'ordinamiento foral (pues, en Aragón, *"antis bi abió leis que reis"*).

Istos son, en a mía opinión, os zinco elementos d'o legato ideolochico e politico de l'antigo Estado aragonés que más han contrebuyito á ra construición d'o "feito istorico" aragonés e aragonesista. Profes que podérbanos adibir moltetú d'atros referens, pero mesos á trigar-ne os que más peso reyal han tenito en a formazión d'una fuerte personalidá identitaria, politica e nazional aragonesa, considero que istos zinco son os que más zereñamén determinaron a distintibidá e a codesión d'o pueblo aragonés.

A esistencia d'o Estado aragónés (o Reino

d'Aragón) en o conzerto d'os Estados d'a monarquía ispanica comportaba o mantenimiento d'un pauto d'unión (que no d'asemilazión u uniformizazión, e menos forzosa) entre iguales teoricos que estió crebato biolentamén en differens ocasions e, de traza definitiba, por o rei Felipe V de Castiella en a Guerra de Sucesión. Ixe punto marca un antis e un dimpués en a relación d'o pueblo aragonés con os poders d'o que güei se conoxe como España: d'unión mutuamén adempribiata ta semisión d'un Aragón cada begata más débil á os intereses d'un Estado que s'enzerrina en acotolar por asemilazión á os pueblos que ha conquistatos.

Si Aragón ha de luitar por estableir una relación chusta y equilibrata con o Estado español en o exerzizio d'o suo dreito d'autodeterminazión, a suya poblazión abrá de remerar muito millor qué yera o que tenébanos como nazión en ixa antiga unión (que no fusión) d'Estados e qué ye o que nos sacoron ta lebar-nos á l'autual situación de retacule. O feito istorico d'a nuestra identidá nazional debe cobrar nueba autualidá ta que, adautan-

do-se á o nuestro sieglo XXI, pueda aduyar a otener a completa deboluzión ta ro pueblo aragonés de toz os poders que li furtoron e que son menister ta que aturemos a menaza de dixar d'estar o que siempre emos quiessto estar sobre a dura pero amata tierra d'os nuestros payes.

Miguel Martínez Tomey

Tramacastiella de Tena,

30 de chinero de 2012

Notas

[1] *El Ebro*, 29, 5 de mayo de 1920 (zitato por Antonio Peiró: *Cien años de nacionalismo aragonés*. Cuadernos de Cultura Aragonesa, lum. 5. Zaragoza, Rolde de Estudios Nacionalista Aragonés, 1988).

[2] *El Ebro*, 65, febrero de 1922 (zitato por A. Peiró, *op. cit.*).



Tant amare, un poema en mozarabe d'o sieglo onzeno

Güei escribo aquí ta presentar a toda a parentalla d'a fabla aragonesa ista canta d'o disco de **Biella Nuei** *Crebar o muro!-Romper el muro!*, feito con mosicos marroquins.

Tant amare ye un breu poema d'amor d'o sieglo onzeno (XI), de dinantes de 1042, en mozarabe, con plateras semellanzas con l'aragonés pon reconoxitas. Ye escrito en alxamía, ye dizer, en carauters arabes, como a mayor parti d'as composizions poeticas en mozarabe. A suya balura ye gran: ye uno d'os primers poemas conoxitos en una luenga romanze d'a península e nomás por ixo ye una alfaya, un chicot tresoro que emos tenito a suarde de trobar. O suyo mantenimiento ye un miraglo, pos a mayor parti d'os escritos en alxamía estioron crematos por a Inquisición, consideratos periglosos por amostrar a importanzia d'a cultura andalusí en estas tierras. Muito s'ha contato d'a destrucción d'os testos mayas e aztecas, pero cosa d'a gran matazía d'a cultura andalusí (mezclallo de chodigos, moros e mozabares) e d'a suya literatura, d'ixa gran esferra d'o nuestro pasau. Iste poema ye un totón que mos remera a estoria enfoscata d'os andalusís, os aragoneses exaricos espulsatos d'a suya tierra por o integrismo relichioso.

O poema ye una jarcha, una breu canta d'amor d'orichen popular enclabata en una moaxaja, una composición en luenga arabe. Anque ista jarcha parixca senzilla, agún mos aturrula a berdá d'istos bersos apasionatos d'una muller empilita d'amor por o suyo *habibi*, o suyo amigo:

*Tan t'amare, tan t'amare,
habibi, tan t'amare.
enfermaron welyos gayos
y duolen tan male.*

A trascrizión ye de Carlos ALVAR y Jenaro TALENS, d'a Unibersidá de Chinebra (Suiça), publicata en o muito intresán libro *Locus Amoenus, antología de la lírica medieval de la Península Ibérica* [Barcelona, Galaxia Gutenberg / Círculo de Lectores, 2008, pp. 228-229]. A interpretación ye difízil, pus a escritura arabe no bocaliza e ta leyer os suyos testos cal restituyir as bocals. Ta o disco *Cre-*

bar o muro he feito unos chique cambios en a interpretación ta amanar-la formalmén más ta l'aragonés (escribo *güellos*; meto *goyosos* por *gayos*):

*Tant amare, tant amare,
habibi, tant amare.
enfermaron güellos goyosos
y duolen tan male!*

L'autor d'ista jarcha ye Chusef al-Katib (Yosef o escribe), d'o segundo terzio d'o sieglo onzeno, un poeta chodigo d'orichen inzierto, de muito chicota produción. ¿No ye tot un simbolo de l'Aragón plural e plurilingüe: un chodigo que recreya una canta en mozarabe d'Aragón e que escribe en arabe? Y ¿no ye tamién tot un simbolo de l'olbido d'a nuestra cultura y, espezialmén, d'o nuestro impresionán erenzo andalusí, d'a suya gran balura? Por ixo, emos quiesto fer a canta con **Biella Nuei** e a boz de Oum, que ye una d'as millors cantaires de Marruecos, con o *ribab* de Foulane, o biello briolín andalusí encara conserbato en Marruecos y en bellos lugarons d'España, y l'*axabeba* de Javier Paxariño, a flauta morisca.

Como en otros trobos populars, o testo nos dixa plenos de dandaleos. ¿Dó ye l'aimato? ¿Ye luen e por ixo plora a mozeta? ¿Ye muerto? ¿Ye con atra? No en sabemos cosa. Y una debinalla mosical: ¿Cómo serba o tono ta cantar ista jarcha? ¡Iste poema en tien asabelos de misterios! Como no en tenébanos o tono, a mosica ta cantar istas parolas, prexiné una mosica que remerase as cantas tradicionals d'as mullers, tarabidatas con o platero ritmo de panderas y tempanos, os biellos *adufes* andalusíes. O ritmo crebato d'a melodiya parixe representar ixa tristura interior d'a muller, que no s'aconorta con cosa. Esto que ascuitar ista mosica ye tal como un mirallo an rebiscoliar en o nuestro pasato, tan intresán como esconoxito. Asperamos que tos cuaque. Grazias por a buestra atenzión y ¡a plantar fuerte!, ¡animu en a buestra luita, que ye a de toz nusatros!

Luis Miguel Bajén

REZENSIONS

***Le'n dizié a ra nuei,
de Juan Carlos García Hoyuelos***

ME FAN FALTA DOS NUEIS

No estió prou una nuei,
no entre que o deseo ensista
en engalzar-te dezaga de os zinglos de o sol,
no pas entre que redima
sobre tu o suyo caráuter conzietero,
no pas entre que nadie
a merzé de as ondas de a tuya boca.

No lo será pas, entre que mulles a rosada
de os días siguiens
con as entresudors d'aquélla.
No estió prou, a begatas
dudo si bi estiés,
u te prexiné entre os tragos
dulzes de o pensamiento.
Atras begatas, yes tan omnipresén
que encara o tauto
en as mías mans ye o de o tuyo cuerpo.

Una nuei no estió prou,
conzede-me-ne una más
ta debuxar en os míos labios
a tuya riseta socherén;
quiero aprender de corazón
o ritmo azelerato de os tuyos traquitos
entremistanto s'enrelian
as nuestras respirazions.
Ta insinuar-me
á la tercera luna,
me fan falta dos nueis.

* Traducido al aragonés por Chusé Inazio Nabarro, Presidente d'o Consello d'a Fabla Aragonesa, y mi agradecimiento a Alberto Gracia Trell, también del Consello, por su colaboración. Uesca / Huesca.

Iste que tenez en as ringleras d'alto ye uno d'os poemas que se pueden leer en o libro *Se lo dije a la noche* (Bilbao, Ediciones Beta III Milenio, 2012). Ye un estenso libro de poesía de 365 planas. O suyo autor ye Juan Carlos García Hoyuelos, que no solamén tien delera por a poesía, sino tamién por as luengas, por todas as luengas que se charran en a Peninsula Iberica, mesmo as más chiquetas. Por ixo ha quiesto que tanto ro tetulo d'o libro como bels poemas, estasen traduzitos en as diferents luengas ibericas. "Me faltan dos nueis", ye un poema que amanxe en o libro traduzito en aragonés, tal como podemos leer aquí, por Chusé Inazio Nabarro. Por a suya parti, o tetulo d'o libro biene, amás d'en castellano, traduzito



O poeta Juan Carlos García Hoyuelos, autor d'o libro *Se lo dije a la noche* (*Le'n dizié a ra nuei*).

en una duzena de luengas: basco, portugués, gallego, catalán, asturiano, oczitano aranés, balenziano (con diferén bersión d'o catalán), sefardita (chodigo-español), inglés (por ixo de que se charra en Gibraltar), atra que puede ester o caló u luenga d'os chitanos e un atra que no sapemos cuál ye. A tradución en aragonés que beyemos en a portada no ye *Le'n dizié a ra nuei*, tal como metemos en o tetulo d'ista rezensión: inoramos por qué razons, pero no ye escrito correutamén d'acuerdo con as *Normas graficas de l'aragonés*. No ye de reibo. Muito menos cuan bi ha discrepanzia entre as trazas d'escritura d'o tetulo d'o libro e d'o poema en aragonés. Como diz Juan Carlos Mestre, Premio Nacional de Poesía 2009, d'iste libro: «Ye a boz d'os que sapen que a polideza ye tamén un auto de resistencia zebil á os mals d'a época. Ye l'asambleya de bozes e palabras, d'os suenos que pendiens d'estar soniatos ubren agora a posibilidá d'estar o leco d'atra nuei, a moltitú de tot o que enzarra a mosica d'as estrelas ta que seiga sentido ro mandato de bella misteriosa e nezesaria luz. Iste libro ye a nezesaria e zerrena asperanza de l'amor a ra bida». Una boz e una asperanza que tamién –si bien parzialmén– se pueden leer en aragonés.

Úrbez SORROSAL

Dizionario botanico e zoologico d'o piemontés

Reseña de: GIAMELLO, Giacomo (2004), *Dizionario botanico*. Piobesi d'Alba (Cuneo), Sori edizioni.

GIAMELLO, Giacomo (2005), *Dizionario zoologico*. Piobesi d'Alba (Cuneo), Sori edizioni.

O piemontés ye una luenga que se charra en o noroeste de Italia, arredol de Turín. Toca con a luenga d'Oc por l'ueste, con o francopro-benzal por o norte e con o lombardo por o este (Milán). Ye d'a colla de luengas galoitalianas, dintro d'o romanze ozidental, en o cualo tamién ye o aragonés. Dende 2004 Giacomo Giamello ha ito publicando bels libros sobre o piemontés, dos d'os cuales tienen espezial intrés ta o que isto escribe: o *Dizionario botanico* (2004) e o *Dizionario zoologico* (2005) (1). Os dos han un tarabidato parellano, con os diferenx nombres en piemontés aduyatos d'a traduzión en anglés, franzés e italiano, amás d'o nombre zientífico.

Entre os dos se replegan más de 9000 terminos, con esplicacions sobre etimos, terminos asoziatos e, en o caso d'a fauna, falordias, chuegos, debinetas, frases feitas, refrans, anatomía, razas, metaforas u toponimia relacionata. Bels testos probienan d'a zona d'o autor, l'Alta Langa, en o sur d'o país; astí os articlos se fan con o mesmo soniu d'a [r] d'a barián aragonesa u gascona: "ra vaca: misin-a 'd beu / misin-a 'd vaca / chi r'he 'r ma, us ru grata" (ra baca: medizina de gua, medizina de baca, qui tiene ro mal, se'n rasca).

Istas obras son un buen cote ta contimparar os nombres piemonteses con os aragoneses, e mirar de tirar as conclusions que pertoquen. En primeras, cal decir que con ser luengas chermanas u cuasi, bi n'ha muitos que son comuns no sólo entre ellas, sino con todas as de a Romania, por o que no tienen más intrés que a contrimuestra d'o patrimonio común que ba dende Rumanía dica Portugal. E no sólo con os terminos latinos, sino tamién, por exemplo, con belunos chermanicos, como *tassun* (taxugo, taxón) u o *buchetin* u *stanbech* (bucardo). Bella begata

surte un termino que da más chuego; u bien porque son palabras que remiten a territorios más estreitos, u bien porque reproduzen metaforas, trazas de beyer e baltizar o mundo similars. Paso a charrar belunas:

O *Triturus alpestris*, una mena de guardafuens fino, e a *Salamandra salamandra*, anfibios, han entre atros, o nombre de *lavarban* (isto ye "laba-salbau" u "laba-breno"), que por o suyo caráuter de limpieza remera a o nombre común d'o guardafuens (*Euproctus asper*). Ye destacable porque os anfibios han asobén una ideya de periglo alueñata d'ista otra.


A caparra comparte con o italiano o nome de *zecca* (*sëcca, secca...*), igual como una d'as menas conoxitas en aragonés, *a seca*.

A pantingana *Tettigonia viridissima* se conoxe como *catalineta*, nombre que en aragonés define a cuqueta de dios. As arainas garrilargas, se claman igual: *aragn dër gambe lunche*. Tamién se claman *crava* e *cravetta*, parabras que bienen d'un mamifero, a craba. En isto s'achuntan o Piemonte, os gascons e nusatros. Os tres compartimos tamién *loira* (*Lutra lutra*), que en o caso piemontés ye *lùiro*.

Sciirs ta ra gripia u escurzón, fa un biache dende Aragón enta Italia, pasando por o catalán e l'ocxitano. Tamién *vipra*, que remera a ra nuestra *gripia* (de VIPERA).

Dintro de as aus, belunos d'os muitos nombres ta ro garabiu (*Burhinus*) son *terlüch*, *starlüch*, *turlu* u *stërlüch*, parellanos a os aragoneses *terlid* y *esterlit*, no guaire luen d'o catalán *torlit*.

O codalbet (*Delichon urbica*) ye *cübianch*, equibalén de l'ocxitano *cul-blanc*. D'entre as zistras (*Emberiza*) —con nombres chenericos que remeran o suyo canto: *zip, sippa, zia, sia...*— destan *barbisun*, *barbisin*,



barbisa, equibaléns a o aragonés *zirbarbú* u *zistra barbu-dá*. Bella cosa parellana pasa en oczitano: *chi-barbassié*, *chi-moustacho*. As aletas (*Muscicapa*, *Ficedula*) se repiten como *alëttin* u *alëttin gris* (= aleta grisa). En iste caso se pueden trobar bels parexitos en castellano, más os gascons *alabat(e)* e *alablanc*. *Vulundranin* e *vulundranina* sirben ta ra *bolandrina* benasquesa u a *gulundrina* de Pandicosa e Luesia.

As ciblancas (*Oenanthe*), *coulblancs* gasconas (*cull-blanc* en Benás), son *cibianch*, *culbianch* e *cul bianco* en o Piemonte. Dende o blanco imos a o berde claro, o *GAL-BUS* latino, que talmén siga en l'orichen onomatopeyico d'o *garabiu* u *cagadaga* (*Oriolus*), asinas como d'os *garabé*, *garba*, *garbá*, *garbé*, *garbéu*, *garapé*, *garabé*, *galbré* pie-monteses.

Más clara ye a onomatopeya d'a cholibeta (*Otus scops*), *ciuch*, que afina a orella igual que o benasqués *cluc*. Dende o soniu enta ra metafora, o cardenal (*Pyrrhula*), queda en *cardinal* u *canònich*, con a sua facha reziota, roya dica ra papada e negra en a capeza. Atro d'os suyos nombres, *useł èd la fioca* copia o benasqués *moixón de la neu* (ta o pintaparet) u a os paxaricos nebers (engañapastors, papirroi). *Cardenal* tamién se puede sentir en gallego.

O crabero (*Strix aluco*) ha entre atros a denominación de *genavel cravé*. O autor, igual como gosa pasar en a explicación popular aragonesa piensa en crabas, pero no cal dixar a palabra castellana, *cárabo*. En oczitano tamién *machoto-cabriero*, *cabriero*, *cabraret*, *ezetra*, e con a mesma explicación (GALTIER).

Remato as aus con a torda collerada, *merlu dèl cularin*, que ye una torda propia d'a montaña.

Os nombres d'as matas go-san remitir a os suyos oríchens latinos en toda a Romania. Con tot, he trigato belunos que, más que más por a coincidencia en as metaforas, trucan más l'atenCIÓN. Asinas:

– *Achillea millefolium*: *erba dij taj*, *yerba de'l tallo*, entre atros nombres aragoneses. *Hwélla dé tall* (fuella d'o tallo) en Luchon, *herba de tall* en catalán.

– *Aconitum napellus*: *tora*, *toru*, a *tuara* en aragonés. Igual en oczitano e catalán, *tora*.

– *Fagus sylvatica*: *fau*, termino común en oczitano e profés aquí, o *fau*.

– *Galium aparine*: *rasp-rola*, *raspela*. *Rasperuela* aquí (*raspialla*: *Rubia peregrina*). *Rapadero* en l'Alta Garona.

– *Helleborus foetidus*: *sér-pentass*, pan de culebra, entre atros sinonimos aragoneses.

– *Hieracium umbellatum*: *erba infernal*, yerba de o diaple.

– *Hordeum murinum*: *gran dèr diau*, trigo de ro diaple (literal). L'ordio normal, ordi, como en catalán.

– *Lonicera alpigena*: *ciresa'd muntagna*, ziresa montesina ye aquí a *Lonicera pyrenaica*.

– *Melampyrum pratense*: *ën-grassa beu*, *angrassa beu*, isto ye, engorda guas, que ye *trigo de baca* en aragonés, e asinas mesmo en catalán (*blat de vaca*).

– *Mentha suaveolens*: mentastr, mentastro, mastranzo. *Mentastre* en oczitano, *mentastro* en portugués y gallego.

– *Primula vulgaris*: fiur èd cüch, pan cuciat, pan cucèt, fiù 'd cüch, cucut, flu de cucuch, erba cucuda (as segundas [ü] e flu como en fr. venu). Equibalens a ras aragonesas, pancuculo, pan de cuculo u cuculetas. *Cucut* en catalán. *Cucut, erba de cucut, cucú* en oczitano, dende o Atlantico dica d'os Alpes.

– *Prunus avium*: ceresera, cere-sé, ciresa, ceresa. Aquí lo escribimos con zeta (latín CERASUS).

– *Ribes uva crispa*: grisela, griü-sela – grixolera, grixola en Benás (gascón graserolo, grachinés, grosella, groselha, groseille).

– *Sedum acre*: ris dle serp, arroz de culebra. Arroz de serp en Castellón.

– *Silene vulgaris*: s-ciupat, s-ciupet (escopeta) - as petaderas u es-clafideras. Petaderas, sclatadero en gascón. Herba dels pets en catalán.


– *Sonchus arvensis*: latasin, o letazín.

– *Viburnum lantana*: merda gata; merda gato ye o suyo fruito en a bal de Benás.

Encara que no más siga a ran de modesta reseña, se pueden columbrar pues bels terminos comuns entre l'aragonés, o catalán, l'ocxitano e o piemontés que reforzarban una ideya de continidá entre os Perineus e os Alpes dintro d'a transición natural entre as luengas romanicas ozidentals.

RAFEL VIDALLER

(1) Se pueden baxar en <http://www.erbariopiemontese.com/>.



BIBLIOGRAFÍA:

BEIGBEDER, Francis (1986) *Auseths. Les noms gascons des oiseaux sauvages*. Penguin (Biarn), Per Norte / Nosauts de Bigòrra.

BERNIS, Francisco (1995): *Diccionario de nombres vernáculos de aves*. Madrid, Ed. Gredos.

DALBERA, Jean-Philippe: *THESOC Base de données linguistiques*. En <http://thesaurus.unice.fr/recMot/indexMot.html>

GALTIER, Charles (2006): *Les oiseaux de Provence dans le savoir populaire*. Montfaucon (Provence), Editions Librairie Contemporaine.

MORALES, Ramón et al. (1996): *Archivos de flora ibérica*, num. 7. Nombres vulgares II. CSIC - Real Jardín Botánico, Madrid.

SEGUY, Jean. (1953): *Les noms populaires des plantes dans les Pyrénées Centrales*. Barcelona, CSIC - IEP, Monografías del Instituto de Estudios Pirenaicos, nº 100.

VIDALLER TRICAS, Rafel (2004): *Libro d'as matas y os animals. Dizionario aragonés d'espezies animals y bechets*. Zaragoza, Consejo de Protección de la Naturaleza de Aragón. (Se puede baxar en <https://sites.google.com/site/casaflor/triballos>).

Sobre fonética histórica aragonesa, de J. Vázquez Obrador

Sobre fonética histórica aragonesa, de Jesús Vázquez Obrador, ye un libro publicato por Publicacions d'o Consello d'a Fabla Aragonesa, con a colaboración d'o Instituto de Estudios Aragoneses e d'o Grupo Emerchén d'Investigación en Filolochía Aragonesa (FILAR). Ye de destacar, en primer puesto, ista colaboración editorial, que ha feito posible a publicación d'iste libro.

En segundo puesto, cal estacar a portada, que reproduze un troz d'a *Crónica de San Juan de la Peña* (u *Coronica de los reis de la Corona d'Aragón*), chustamén en do se reconta a muerte d'o rei Sancho Remírez en o sitio de Uesca. Un troz de testo en aragonés d'o sieglo XIV ye bien branquil ta dentrar en o libro.

E ya dentrando en o sustancial, que ye o contenito, o libro replega siete treballos de Chesús Vázquez Obrador que ya yeran estatos publicatos en diferens rebistas espezializatas en lingüística e filolochía. Prezisamén ixe feito da fe d'a calidá d'istos estudios; pero, por atro puesto, ixa misma dispersión feba difízil a suya localizació. As dos cosas son razons que se menzionan en a cuentaportalada d'o libro ta chustificar que agora s'achunten en un libro.

Os siete treballos tratan diferens aspeutos d'a fonética istorica de l'aragonés: d'astí o tetulo d'o libro.


O primer estudio trata d'a diacronía bocalica en a toponimia de Sobremón, Sobrepuerto e Tierra de Biescas (pp. 9-64). Ye un completo repaso d'as soluzions que trobamos en a toponimia d'ixas redoladas, tanto en as bocals tonicas como en as atonas, en diferens posizions. D'especial intrés son os testimonios de diftongazión É > iá e Ó > uá, asinas como a metafonía (*Fondanito*, pero *Fondaneta*; *cumo*, pero *coma*).

Os dos estudios siguiens se refieren a o mesmo tema: as soluzions en aragonés, tanto en a toponimia como en aragonés meybal, d'a cheminata latina -LL-. Asinas, o segundo estudio se zentra en as soluzions de -LL- en a toponimia de Sobremón, Ribera de Biescas e Sobrepuerto: i trobamos -ch- quasi siempre (en Sobremón, e zona norte d'a Ribera de Biescas e de Sobrepuerto): *Capaniacha, Planiacha, Tubiecho*,...; -ll- menos a ormino (en a zona sur d'a Ribera de Biescas e de Sobrepuerto): *Pardinillas, Saltiello, Collata*; e -t- bella begata (e solo en Escartín): *Batella, Castetillo*. Dimpués d'una primera parti adedicata a esposar os exemplos trobatos, en a segunda preba de trobar una esplicación fonetico-fonolochica, parando cuenta en documentación escrita d'os sieglos XV-XVI, plegando a conclusions muito nobedosas sobre a presenzia de sonidos apico-palatals en aragonés.

O terzer treballo (pp. 101-113) profundiza en iste mesmo tema, pos presenta un testimonio meybal antigo d'a cacuminalización de -LL- en aragonés, plegando a ra conclusión de que en os sieglos XV-XVI encara debeba d'esistir un fómena apico-palatal u cacuminal en a zona d'o Biello Aragón.

O cuatreno treballo (pp. 115-153) estudia a evoluzión de -NN- e -ND- en a toponimia d'a cuanca alta d'o río Galligo. A conclusión más relebán ye que a solución cheminata -nn- debió d'esistir en l'aragonés d'ixa zona, contrastando con -n- (*canna* ‘caña’, fren a *cana* ‘perra’) dica empezipios d'o sieglo XX.

Bi ha dos treballos que profundizan en temas semellans, o zinqueno, sobre particularidades morfonolochicas en a formación d'o plural en altoaragonés arcaico, a ra luz d'a toponimia, e o seiseno, sobre testimonios d'apocope de -e e -o d'o singular en formar o plural en documentación d'os sieglos XIII e XIV: as argumentazions e as conclusions d'os dos se complementan.



En a bastida d'o Día Internazional d'a Luenga Materna, o Campus Unibersitario de Uesca, á trabiés d'o Diploma d'Espezializació en Filolochía Aragonesa, organizó l'auto de presentación d'o libro *Sobre fonética histórica aragonesa*, de Chésus Vázquez Obrador. L'auto se fazió o día 22 de febrero, miércoles, a ras güeito e meya d'a tardada, en a Sala de Chuntas d'a Facultá de Zenzias Umanas e d'a Educación, en a carrera de Carderera, de Uesca. En a foto beyemos en o zentro á l'autor d'o libro, Chésus Vázquez Obrador, con Javier Giralt (enta par d'a zurda), que ye o Direutor d'o Departamento de Lingüística Cheneral e Ispanica d'a Unibersidá de Zaragoza, e Chusé Inazio Nabarro (enta par d'a dreita), Presidén d'o Consello d'a Fable Aragonesa. Tamién bi estioron Pilar Bolea, Bizerretora d'o Campus de Uesca, que presidió l'auto, Fernando Alvira, Direutor d'o Instituto de Estudios Altoaragoneses, entidá que ha colaborato en a publicación d'o libro, e Francho Nagore, Direutor d'o Diploma d'Espezializació en Filolochía Aragonesa. [Foto feita por Víctor Ibáñez]

O zaguer treballo (pp. 187-209) ye un completo repaso a os rasgos de fonetica istorica aragonesa que se troban en un documento de Montaragón d'o sieglo XI, que estió editato por Ángel Canellas en 1964 e que dimpués editó M^a Dolors Barrios en 2004. A conclusión ye que en ixa epoca ya ye posible trobar bocables propios de l'aragonés por a suya fonetica, anque os documentos se redauten en latín, mesmo tendendo a pribar os elementos populares charratos.

En resumen, nos trovamos debán d'una replega de treballos d'enorme calidá dende o punto de bista teunico, que aportan datos, argumentazions e conclusions de gran intrés sobre aspeutos que dica agora yeran escuros, no guaire u branca estudiatos, en relación con a evolución fonetica de l'aragonés (que en bels casos afeutan tamién a ra morfolochía, como

en os estudios 5 e 6).

L'autor ye bien conoxito por os suyos estudios sobre toponimia e sobre o desembolicamiento istorico de l'aragonés: en 2010 rezibió o Premio “Fernández de Heredia”, d'imbestigación sobre filolochía aragonesa, d'o Gubierno d'Aragón. Ye enfilador d'a rebista de filolochía *Alazet*, que publica o IEA, e ye profesor de “Formazión e desembolicamiento de l'aragonés” en o Diploma d'Espezializació en Filolochía Aragonesa.

Iste libro rescata, achunta e acabalta bels treballos –siete en total, publicatos entre 1993 e 2010 en diferens rebistas espezializtas de lingüística e filolochía–, que meten zereños alavez ta o conoximiento d'a diacronía d'a luenga aragonesa.

Frانcho Nagore Laín

L'Alto Alcanadre: a montaña olvidada

Alberto GRACIA TRELL

Arturo GONZÁLEZ RODRÍGUEZ, *La montaña olvidada. Despoblados del alto Alcanadre*, Boltaña-Zaragoza, Centro de Estudios de Sobrarbe, 2008. 2ª edición, 2009. 297 pp.


Encara que Ainielle fue o lugar que acucutó lo mundo d'a despoblación brincando dellá d'as buegas d'o nuestro país, son muitos atros os lugarez que han tenito a mesma fin y l'Alto Alcanadre en ye buena muestra.

L'Alto Alcanadre, o territorio ocheto d'o treballo d'Arturo González, ye una zona enclavata arredol de cuatro cuencas fluviales: barranco Used, riu Alcanadre, riu Balzez y barranco Mascún, abracando parte d'as comarcas d'Alto Galligo, Semontano de Balbastro y, en buena mida, Sobrarbe y, que, antiparte, buega por o sur con a Plana de Uesca.

O libro, que ha tenito una sobrebuena acullita y requesta, ye un recorrito por os bentséis despoblados –que inclui lugares, pardinas, buerdas u armitas– de dita zona que estión poblatos dica no fa guaire. Por meyo de más de setenta rutas –ya siga a piet u en bizicleta de montaña– magnificamén descritas ta toz os publicos y complementatas con fichas técnicas y croquis y más de mil fotografías ilustratibas, o lector puede fer-se una ambista d'a realidá d'o que fuen toz istos lugares y d'o que, en a mayor parte d'os casos, se puede beyer güe. Se complementa, antiparte, con un prologo de Severino Pallaruelo, a descripción aspra y dura d'a realidá natural d'a zona por José Antonio Cuchí y se zarra o libro con un emotibo relato d'o propio autor, “Forno”, que repasa y recrea a bida d'antes más por meyo d'o zagueiro abitador d'Alastrué.

L'autor ha feito una gambada a piet plano de quatre años de durada por toz os pinganez d'una tierra quasi zanzera, que no gosa estar frequentata por turistas ni ha rezibito mica estudio y cuenta con una bibliografía más que radita por o que ista obra se combierte ya en impresindible. De bez ye un territorio espoliato, esconoxito y olvidato de tot, firme deteriorato, pos día sin atro y tasamén sin parar cuenta se pierde una gran parte d'a suya istoria y patrimonio.

Arturo González para espezalmén cuenta en ixe rico patrimonio y en o tesoro etnolochico que contién iste territorio: l'arquitectura popular –más que más a clau d'a bida altoara-



O molino de Bara, una d'as muitas imáchens que bi ha en o libro.

gonesa: a casa-, infraestructuras pastorils, molins, mallatas, parideras, fuens, arnals, biellizos camins ya perditos, restos de poblamentos mediebals (como Os Melons), posibles dólmens, fuesas y bestichios mediebals, puzos, toponimia (Balluals, Serrato, A Plana, Fraxinetto, A Riera, A Collata, A Fabosa, o propio lugar de San Póliz, etz.), os árbols u a cheolochía. L'autor aproveita ta estableir comparazions con otras zonas de l'Alto Aragón, ufrindo una interesán cosmobisióñ d'os abitadors d'ista montaña olvidada y reflexando un mirallo de lugarons como Miz, Matidero, Bibán, Binueste, Alastrué, Nasarre, San Póliz, Otín, Bellanuga u as Torrillualas que mantenión as suyas carreras plenas de bida, que parlón en luenga aragonesa y en os que agora nomás ye presén o silenzio, l'olbido y a soledá.

En suma, ye una obra que sobrex de datos y fotografías, que ye de muito mal fer una relación de toz os detalles que albergan as suyas fuellas en poquet espazio, pero que prou que tamién ye una alfayeta que, en gran mida, dignifica l'Alto Alcanadre y as chens que lo abitón.

CLAMAMIENTOS

XIII Premio «Ana Abarca de Bolea» (2012) ta libros de poesía

O Consello d'a Fábula Aragonesa fa o clamamiento d'a docena edición d'o premio “Ana Abarca de Bolea” **ta libros de poesía en aragonés**, correspondién á l'añada **2012**, que se reglará por as siguiens

NORMAS DE PARTIZIPACIÓN

1. Os treballos consistirán en un libro inedito de poemas escritos en aragonés.
2. Se presentarán tres copias imprentatas d'os treballos, feitos en ordinador, á doble espazio e á una sola cara, e con una amplaria d'entre 600 e 1200 bersos. Se presentará tamién o treballo grabato en un disquet.
3. Os treballos lebarán un tetulo e un lema, os cuales se cuaternarán en una carpeta postal zarrata, drento d'a que se meterán o nombre e dos apellidos e l'adreza de l'autor/a, asinas como lo lugar e calendata de naxenzia e a profesión u quefers.
4. Os treballos s'endrezarán por correyo zertificado ta: **Consello d'a Fábula Aragonesa**, XIII Premio “Ana Abarca de Bolea” (2012), trestallo postal 147, 22080 Uesca, antis d'o 30 de setiembre de 2012.
5. A dezisión d'o premio e as presonas que componan o Churato se ferá saper publicamén en o mes d'outubre de 2012.
6. O premio consistirá en 600 euros ta l'autor/a e a publicación d'a obra ganadora.
7. O Churato podrá dezidir no atorgar o premio á denguna d'as obras presentatas, asinas como atorgar menzión espezial á beluna e consellar a sua publicación. L'autor/a con menzión espezial recullirá un premio de 150 euros. En dengún caso se pueden trestallar os diners d'o premio e d'a menzión espezial: si alcaso, o Churato podrá atorgar una segunda menzión espezial, sin de pre en diners, pero podendo consellar tamién a publicación d'a obra. A sua dezisión ye inapelable.
8. A obra ganadora y, en o suyo caso, a obra u obras que tenesen menzión espezial, serán publicatas seguentes as normas graficas de l'aragonés (emologatas en abril de 1987) por a editorial Publicacions d'o Consello d'a Fábula Aragonesa, qui s'alza os dreitos d'a primera edición, asinas como os dreitos de publicación d'atras possibles edizions, tanto en aragonés como en cualesquier atra luenga, e tanto en papel como en formato dichital.
9. Os treballos presentatos que no se reclamen en o plazo de 30 días naturals, que prenzipiarán á contar dende a calendata en que se faiga publica a dezisión d'o Churato, quedarán en propiedá d'o Consello d'a Fábula Aragonesa, que podrá publicar-los, tanto en aragonés como traduzitos en atras luengas, e tanto en formato tradicional en papel como en formato dichital.
10. A presentación á iste premio suposa l'adempribio d'istas normas por parti d'as presonas que partezipen en o mesmo.

Uesca, otubre de 2011
CONSELLO D'A FÁBULA ARAGONESA

Luenga & fablas, lumero 12-13
(2008-2009)


ISSN: 1137-8328. Un tomo de 333 planas.

SUMARIO

Treballos: M^a Ángeles CIPRÉS PALACÍN: *La poesía contemporánea en lengua aragonesa: análisis de su trayectoria y estudio de algunas constantes* (pp. 7-52); Cecilio LAPRESTA / Ángel HUGUET / Silvia CHIREAC: *Demografía, apoyo institucional y estatus del aragonés en su dominio. Un análisis desde la perspectiva de la teoría de la vitalidad etnolingüística* (pp. 53-74); José Ignacio LÓPEZ SUSÍN: *Un amanamiento á o estudio d'o lesico churidico aragonés como luengache teunico* (pp. 75-105); Santiago BAL PALAZIOS: *Internet e l'aragonés: periglos e abantallas* (pp. 107-114); Zésar BIEC ARBUÉS: *Literatura infantil e chobenil en aragonés* (pp. 115-128); Chorchi DÍAZ GÓMEZ: *La perifrasis aber de + infinitivo en aragonés benasqués* (pp. 129-142); Daniel LERÍN e Tresa TIÑENA: *Replega de toponimia en a Baxa Guarguera* (pp. 143-151); Antón EITO e Chaime MARCUELLO: *¿Puede a inmigración cambear a imachen de l'aragonés? Bels apuntes dende a soziolochiya* (pp. 153-160); Alberto GRACIA TRELL: *Notas sobre l'aragonés de A lueca, de Chuana Coscujuela* (pp. 161-179); Santiago Jorge PARICIO MARTÍN / Fernando SÁNCHEZ PITARCH: *Peculiaridades morfosintácticas en Viu (Foradada de Toscar; Ribagorza)* (pp. 181-188); Chusé Inazio NABARRO: *Os Monegros como tema literario en a poesía en aragonés* (pp. 189-200); Paz RÍOS NASARRE: *A guerra zebil en a literatura en aragonés* (pp. 201-212); Chusé Antón SANTAMARÍA: *Ironía, sarcasmo e paradoxa: reflexo de o caráuter en a paremiolochía aragonesa* (pp. 213-226); Rafel VIDALLER TRICAS: *O lesico d'o mundo natural en o sieglo XV* (pp. 227-236).

Coronicas: L.-X. FLORES I ABAT: *Lo patrimonio lingüístico aragonés d'el País Balenziano á estudio: Coronica de la I Jornada sobre els parlars valencians de base castellanoaragonesa y reflesions arrán d'ista fita istorica* (pp. 239- 249).

Documentación: CONSELLO ASESOR DE L'ARAGONÉS: *Resoluzions 41-50 (2008)* (pp. 253-268); CONSELLO ASESOR DE L'ARAGONÉS: *Resoluzions 51-55 (2009)* (pp. 269-274); CONSELLO



ASESOR DE L'ARAGONÉS: *Informe lumero 5 (2008): Enample d'a lista patrón d'os nombres d'as aus en aragonés* (pp. 275-280); CONSELLO ASESOR DE L'ARAGONÉS: *Informe lumero 6 (2009): o bocable buega* (pp. 281-286); CONSELLO ASESOR DE L'ARAGONÉS: *Informe lumero 7 (2009): Nomenclátor d'os monezípios e lugars d'a Comarca d'a Chazetania* (pp. 287-300); CONSELLO ASESOR DE L'ARAGONÉS: *Informe lumero 8 (2009): Nomenclátor d'os monezípios e lugars d'a Comarca d'o Semontano de Balbastro* (pp. 301-312).

Rezensions: F. NAGORE: *Como minglanas, d'Ana TENA PUY* (pp. 315-318); F. NAGORE: *O Parlamento de Barbenuta*, de Fernando OTAL (pp. 319-323); Ó. LATAS: *L'aragonés de A Baxa Galliguera*, de Chesús de MOSTOLAY (pp. 325-328).

Información sobre os autors colaboradors d'iste tomo (pp. 329-332); Normas ta ra publicazióen en *Luenga & fablas* (pp. 332-334).

Luenga & fablas ye una publicación anual de rechirias, treballos e documentación arredol de l'aragonés e a suya literatura. Conduta de suscripción anual: 25 euros (*Luenga & fablas* e *Fuellas*). Lumero suelto: 15 euros. Adreza ta demanda d'exemplars, suscrizions e nimbío de treballos ta ra suya publicazióen: *Luenga & fablas*, Abenida de Os Danzantes, 34, baxo. E-22005 Uesca (Aragón). Trestallo postal 147, E-22080 Uesca (Aragón).